


# ANG PATRIARCA

## NGA SI ABRAHAM

 Basahon sa Genesis usab, sa ika-22 nga kapitulo, sugod sa ika-15 nga bersekulo, ug ginalauman nato karon nga mamulong lamang kita sulod sa pipila ka gutlo ug sugdan na ang panerbisyo. Genesis 22, sugod sa ika-15 nga bersekulo.

*Ug ang manulonda sa GINOO nagtawag kang Abraham sa ikaduha gikan sa langit,*

*Ug miingon, Tungod sa akong kaugalingon nanumpa ko, nagaingon ang GINOO nga tungod kay gibuhat mo kini, ug wala ka magdumili kanako sa imong anak, sa imong bugtong anak:*

*Sa pagpanalangin ikaw pagapanalanginan ko, ug sa pagpadaghan pagapadaghanon ko ang imong kaliwatan ingon sa mga bitoon sa langit, ug ingon sa mga balas nga atua sa baybayon sa dagat; ug ang imong kaliwatan manag-iya sa mga ganghaan sa iyang kaaway;*

*Ug diha sa imong kaliwat mapanalanginan ang tanan nga mga nasud sa yuta; kay gituman mo ang akong tingog.*

<sup>2</sup> Pagkaanindot nga saad, tungod sa pagsugot! Ang pagsugot mao'y gusto sa Dios. Ngani gikaingon kaniadto, “Ang pagsugot labi pang maayo kaysa halad.” Ang tumanon ang Ginoo labi pang maayo kaysa unsa mang halad nga imong mahimo.

<sup>3</sup> Ginaatubang nato karon ang usa ka dakung teksto, karong gabhiona, *Ang Patriarca Nga Si Abraham*, nga gitawag nga “ang amahan sa Pagtoo,” tungod kay nagsaad man kaniya ang Dios nga pagapanundon niya ang yuta, ug sa iyang Binhi. Ug pinaagi ni Abraham nga kita, ingon nga mga patay na diha kang Cristo, nahimong Binhi ni Abraham ug mga manununod uban Kaniya sumala sa saad.

<sup>4</sup> Bueno, si Abraham usa ka ordinaryong tawo lamang, dili ingon nga usa ka espesyal. Wala siya gitawag sa Dios, sumala sa unsa man nga rekord nga aduna kita, hangtud nga miabot siya og setenta'y-singko anyos. Ang iyang asawa, nga igsoon niya sa amahan, nga saisenta'y-singko anyos pud ang panuigon niadtong panahona, tingali'g nag-ipon na sila sukad niadtong mga batan-on pa kaayo sila. Ug ang iyang asawa apuli, ug walay mga anak. Nagtawag ang Dios og bug-os nga paghimulag, aron ihimulag ang iyang kaugalingon gikan sa tanang uban pa sa kalibutan, ug gikan sa tanan niyang mga paryente, ug gikan sa

tanan niyang mga kabanayan. Tungod aduna ma'y espesyal nga butang nga iyang pagabuhaton.

<sup>5</sup> Ug pag ginalauman sa Dios nga mobuhat ka og usa ka espesyal nga butang, gikinahanglan pud Niya ang bug-os mong paghimulag gikan sa unsa man nga pagduhaduha. Gikinahanglan nga moabot ka sa bug-os nga pagtuman, aron tumanon kung unsa ma'y Iyang isulti. Kana ang gikinahanglan sa Dios. Dili mo mahimo kana sa uban pang paagi. Ug, karon, kanunay Siyang nagahatag og panig-ingnan, ug kadto mao ang Iyang panig-ingnan, mahitungod sa usa ka bug-os nga paghimulag gikan sa tibuok niyang pamilya, gikan sa tanan niyang mga kabanayan, ug uban pa, aron magkinabuhi og usa ka kinabuhi nga linain alang sa Dios.

<sup>6</sup> Milabay ang mga tuig, wala gyu'y nahitabo, pero sa gihapon nanghawid gayud si Abraham. Wala siya nadiskurahi. "Wala siya nagduhaduha sa mga saad sa Dios tungod sa kakulang-sa-pagtoo, kondili nagmalig-on, nga nagahatag og pagdayeg ngadto sa Dios."

<sup>7</sup> Sa matag tuig, nga milabay, walay pagduhaduha nga daghang mga kritiko kaniadto ang nangduol ug miingon, "Abraham, amahan sa mga kanasuran, pila na ba ang imong mga anak karon?" Pero wala kadto nakapaduhaduha kaniya. Ingon nga walay anak, ug si Sarah lagpas na sa panahon sa kinabuhi, sa pagpanganak, siyempre, lagpas na sa pag-menopos, apan bisan pa niana si Abraham mitoo gihapon sa Dios. Nangandam na siya para sa maong bata, tungod kay nasayod man siya ug bug-os nga nagasalig nga dili mahimong magsaad ang Dios kung dili Niya bug-os nga pagatumanon.

<sup>8</sup> Ingon niana pud mismo ang panghunahuna sa iyang Binhi. Bisan unsa pa ka daw dili-tinuod kini, bisan unsa pa ka daw dili-natural kini sa natural nga panghunahuna, apan dili gyud mahimong magsaad ang Dios kung dili Niya kini bug-os nga pagatumanon. Nagatoo kita nianang mao gihapong butang sa karong panahon. Ang matag tinuod nga Binhi ni Abraham nagatoo sa mao gihapong butang. Bisan unsa pa ang mga kahimtang, bisan unsa pa kadaghang kahibalo ang atong naangkon, bisan unsa pa kadaghang butang ang nangahitabo, bisan unsa pa kini ka dili-natural sa natural nga panghunahuna, bisan unsa pa kini kahangal, diay, sa natural nga panghunahuna, wala kana'y bisan gamay'ng diperensya. Kung mao kana ang giingon sa Dios, nan mao na kana. Ug ang Binhi ni Abraham nagapahiluna gayud sa MAO KINI ANG GINAINGON SA GINOO. Mao na gyud kana.

<sup>9</sup> Nahibaloan nato, nga baynte-singko ka tuig human niadto, wala gihapo'y mga anak. Ug bisan pa man matinud-anon gayud ang Dios nga tumanon ang Iyang saad kang Abraham, tungod

kay si Abraham mitoo sa Dios. Tuod man miabot gyud ang maong gamay'ng batang lalaki sa esena, ang gamay'ng Isaac.

<sup>10</sup> Dayon human nga miabot ang gamay'ng Isaac sa esena, dayon hingsayran nato nga gihatagan sa Dios si Abraham og dobleng pagsulay. Ang ingon Niya, “Kini nga bata . . .” Human niadto nga halos usa na ka gatus ug kinse ka tuig ang panuigon, o baynte, si Abraham. Ang ingon Niya, “Gusto Ko nga dalhon mo kini, ang imong bugtong anak, ug dalhon siya ngadto sa bukid nga ipakita Ko kanimo, ug didto ihalad mo siya, niadtong bukira, ingon nga usa ka halad.” Sa laing pagkasulti, gub-on ang matag kapanghimatuoran nga aduna siya bahin sa saad nga matuman. Kana’y walaon ang tanang natural nga mga butang.

<sup>11</sup> Ug miingon si Abraham, “Gidawat ko siya ingon nga usa gikan sa mga patay. Ug bug-os akong nagasalig nga arang Niyang banhawon siya gikan sa mga patay.”

<sup>12</sup> Ingon niana ang mga katawhan karon nga Binhi ni Abraham, tungod kay gibanhaw Niya kita gikan sa mga patay. Ingon nga mga patay pa kita kaniadto tungod sa sala ug mga kalapasan. Ug Siya Nga may kasarang nga usabon ang akong panghunahuna, usabon ang akong mga hunahuna, usabon ang akong kinaiyahan, og bug-os akong usabon, mahimo gayud Niya kung unsa ma’y gusto Niya. Kung unsa ma’y Iyang ginasulti, nagatoo ko nga Kamatuoran kini, ug ang matag Binhi ni Abraham nagatoo sàb sa mao mismong butang.

<sup>13</sup> Si Abraham, nga wala nagmasupilon sa Dios, gidala niya ang batang lalaki. Ug niadtong buntaga, gisultihan ang mga sulogoon, “Maghulat kamo dinhi uban sa mga mula. Ug kami sa akong anak moadto didto aron mosimba, ug mobalik ra kami.” Oh, unsaon niya kaha pagbalik nga ingon niana? Ingon nga motungas man siya ngadto ibabaw sa bukid, aron patyon ang kaugalingon niyang anak, pero bisan pa niana miingon siya, “Ang bata, ang batang lalaki ug ako mobalik ra.” Nasayod siya nga aduna gyu’y mahitabo. Ug wala lang siya kabalo kung unsaon kadto pagbuhat sa Dios; dili na niya problema kadto. Basta nasayod siya nga gisaad kadto sa Dios.

<sup>14</sup> Kana lang ang gusto natong mahibaloan, nga gisaad kini sa Dios! Unsaon man pagkahitabo niini? Dili nako masulti kaninyo. Apan mao kini ang giingon sa Dios! Ipadala Niya si Jesus Cristo, sa ikaduhang higayon, moabot Siya sa usa ka pisikal nga porma. Angkonon Niya ang mga Iyaha Mismo. Magkaaduna og usa ka libo ka tuig, nga paghari sa milenyum sa ibabaw niining yuta, kauban Siya, kauban ang mga tinubos. Mao kana ang gisaad Niya, ug nagapaabot gyud kita alang nianang taknaa nga moabot.

<sup>15</sup> Nagsaad Siya nga ayohon ang mga may sakit, nga banhawon ang mga patay, og nga hinginlan ang mga yawa. Nagsaad Siya nga buhaton kini. Siya mao sa gihapon kagahapon, karon

ug hangtud sa kahangturan. Sa unsa mang paagi? Wala ako masayod. Basta nagsaad Siya nga buhaton kini! Nagatoo kita niini; mao na kana. Pag ang usa ka tawo nagatoo sa Dios, nan ginatoohan niini ang tanan Niyang ginasulti.

<sup>16</sup> Ug sa ingon nianang paagi pud gitooan ni Abraham ang Dios. Karon gisultihan pa siya nga gub-on ang matag kapanghimatuoran nga ang saad sa Dios pagatumanon, pero siya nagasalig gyud nga mahimo kadto sa Dios.

<sup>17</sup> Karon, dili lang ingon nga gihatag sa Dios kining mahimayaong saad, gihatag Niya kini sa iyang Binhi, usab. Ug tungod kay matinud-anon si Abraham, ug gituman ang—ang Pulong sa Dios nga gisaad sa Dios kaniya, ug mao nga nasayod siya nga mahimo sa Dios nga banhawon kining maong bata. Ug wala siya magdumili sa kaugalingon niyang anak; ingon nga (ang Dios) tipo sa Dios nga gihatag ang Iyang Anak, siyempre; samtang gipas-an niya ang kahoy patungas sa bukid, ug uban pa; maingon usab ni Cristo kaniadto nga gipas-an ang Iya Mismong panghalad nga kahoy, patungas sa bungtod, kon diin Siya gilansag sa krus.

<sup>18</sup> Naamgo nato nga tungod niini, tungod sa pagbuhat niini, nakapahimuot gayud kini sa Dios nga makita nga gihigugma Siya ni Abraham labaw pa sa unsa mang butang sa yuta, nga labaw pa sa iyang bugtong anak. Gihigugma niya Siya labaw pa sa unsa man nga mahimong isulti ni bisan kinsa, nga mahimong buhaton ni bisan kinsa, gihigugma gayud niya ang Dios ingon nga gitooan gihapon niya ang Iyang Pulong.

<sup>19</sup> Ang tanang Binhi ni Abraham nagatoo pud sa Dios nga sama niana. Nagatoo sila sa Dios. Ug nasayod kita nga nakapahimuot gayud kini sa Dios mao nga mao kini ang gisulti Niya, “Ang imong kaliwatan manag-iyá sa mga ganghaan sa kaaway niini. Ang imong kaliwatan manag-iyá sa mga ganghaan sa kaaway niini.” Hinumdumi n’yo, kana’y MAO KINI ANG GINAINGON SA GINOO. Ginatoohan kana sa Binhi ni Abraham. Mao nga kung usa ikaw ka tinuod nga Binhi ni Abraham, ang pagtoo ni Abraham sa Dios, anaa pud kini kaninyo. Ug ginatoohan ninyo nga kung unsa ang gisulti sa Dios, ginatuman gayud sa Dios ang Iyang saad.

<sup>20</sup> Ug gisulti Niya kini, karon hinumdumi n’yo, gisaad lamang Niya kini kang Abraham human nga gisulayan Niya siya. Ang Binhi ni Abraham kinahanglan una nga masulayan, aron makita kung nagatoo ba gayud sila sa Pulong. Hinumdumi, ang bugtong paagi nga naangkon niya ang saad sa Dios, mao’y tungod kay gitooan niya ang saad sa Dios, ug nasulayan kung siya ba’y mitoo Niini o wala.

<sup>21</sup> Ginadala sàb kita sa ingon-ana nga pagsulay. Ang Binhi ni Abraham, sa karong panahon, ginadala sàb sa ingon-ana nga pagsulay. Dawaton ba nato ang Pulong sa Dios, o dawaton

nato ang kung unsay gisulti sa tawo mahitungod Niini? Toohan ba nato ang usa ka kredo nga hinimo-himo sa kung unsang organisasyon, ug dawaton kana, o dawaton nato ang kung unsay gisulti sa Dios? Ingon nga ang Pulong sa Dios tinuod, nan ginatoohan gyud nato ang Pulong sa Dios, bisan unsa pa mang butang. Para kanato bakak ang matag pulong sa tawo, ug ang Pulong sa Dios lang ang Kamatuoran. Ingon-ana ang tinuod nga Binhi ni Abraham! Apan sa dili ka pa mamahimong ingon-anang tinuod nga Binhi, gikinahanglan mo unang moagi sa pagsulay, sama sa naagian ni Abraham, mismo. Dili lamang kang Abraham Siya nagsaad, kondili ang iyang kaliwatan usab manag-iy a sa mga ganghaan sa mga kaaway. Oh, grabe!

<sup>22</sup> Palandunga n'yo, ang maong patriarca bug-os gyud nga masaligon niini, nga ang pagsulay kaniya mahitungod sa Pulong sa Dios, husto gayud. Bisan unsa pa ang mga kahimtang, siya mitoo sa gihapon nga ang Pulong husto. Si Abraham, ang halangdong patriarca, wala gayud nagduhaduha sa pagtoo, sa dihang gidala na siya niadto nga panahon sa pagsulay. Mitoo siya nga mahimo sa Dios nga banhawon siya gikan sa mga patay. Gitooan niya kadto, tungod kay nagsaad man ang Dios. Ug sa diha nga nagsaad ang Dios nga siya'y mamahimong "amahan sa mga kanasuran," ug gitooan niya nga mao kadto ang mahitabo. Wala siya masayod kung sa unsang paagi kadto mahitabo. Sa diha na sàb nga miabot ang maong bata, human nga siya misalig, sa baynte-singko ka tuig, pagkahuman gisultihan pa nga patyon ang bata, pero nasayod siya sa gihapon nga tinuod gyud ang saad sa Dios, ug mao nga gihatag niya ang iyang anak.

<sup>23</sup> Ang iyang Binhi, ingon-ana usab! Ang saad sa Dios mao man ang selyo, alang niadtong Binhi ni Abraham. Ang saad usa ka selyo, usa ka gipanghimatud-an nga pagpamatuod. Ug kung ginatoohan nato ang matag gikasaad nga Pulong, nan igahatag kanato ang selyo, aron pinaagi niini panghimatud-an ang saad. Kita n'yo, kung kita—kung kita, ingon nga Binhi ni Abraham, moagi gyud kita sa pagsulay kung motoo ba kita sa Biblia, o dili, ang Biblia mao man ang Pulong sa Dios, tungod kay Kini mao ang Dios mismo, ug pagkahuman moagi kamo sa pagsulay, aron motoo.

<sup>24</sup> Sa diha nga moingon ang uban kanila, "Milabay na ang mga adlaw sa milagro," kung dawaton n'yo kana, supak man kana sa Pulong.

<sup>25</sup> Kung moingon mo, "Dili n'yo na madawat ang Espiritu Santo, karong panahona. Wala na ma'y ingon niana. Ang dose ka apostoles lamang kaniadto ang nakadawat Niini."

<sup>26</sup> Ang ingon sa Pulong, sa pagwali Niini ni Pedro niadtong Adlaw sa Pentecostes, ang ingon niya, "Maghinulsol kamo, ang matag usa kaninyo, ug magpabautismo sa Ngalan ni Jesus Cristo alang sa kapasayloan sa sala, ug madawat ninyo ang gasa nga

Espiritu Santo. Kay ang saad alang kaninyo, ug sa inyong mga anak, ug sa tanang atua sa halayo, bisan ang kapid-an nga pagatawgon sa atong Ginoong Dios.”

<sup>27</sup> Ingon niana ang eksaktong buot ipasabot Niini. Kini’y, karon kung andam kamo nga modawat sa pagsulay, sa magpamatuod nga pagsulay sa Dios, ug sundon kana nga reseta, sultihan ko kamo, mahibaloan ninyo nga ginatuman gyud sa Dios ang Iyang Pulong, kung motoo kamo Niini. Tinuod kana. Pero gikinahanglan ninyong moagi sa niana, tungod kay mao man kana ang selyo; pag madawat ninyo Kini, nan madawat ninyo ang saad. Tungod kay, Kini mao ang reseta sa Dios, ang paagi kung unsaon nato pagbuhat niini, ug mao kana ang pamaagi nga angay natong sundon Kini, kung unsa lang ang Iyang gisulti. Bueno dili lamang sa pipila, kondili “si kinsa man,” si kinsa man nga motoo, si kinsa man nga maghinulsol, si kinsa man nga motoo. Kini’y alang gayud sa tanang kaliwatan, sa tanang mga katawhan, si kinsa man nga nagatinguha nga motoo Niini. Ug ang pagtoo sa Pulong sa Dios ang magadala kaninyo sa niini nga saad. Dayon, ug diha lang niana, nga makabaton kamo og gahum aron mapanag-iya ang selyo sa saad.

<sup>28</sup> Ug ang saad nga madawat nato, ang selyo, mao ang bautismo sa Espiritu Santo. Husto. Kay kana mao ang Dios diha sa porma nga Espiritu, ingon nga kamo ang Iyang Pulong nga anaa kaninyo, dayon mosulod Siya. Kung nadawat ninyo ang Pulong sa kinasuloran ninyo, ang Balaang Espiritu lamang ang makapahimong buhi Niana, ug kung ingon-ana maangkon na ninyo ang saad nga panag-iyahon ang ganghaan sa matag kaaway nga gapaninguhang moatake kaninyo. Tinuod kana. Gisaad man kini sa Dios, ug mamaingon gyud kini.

<sup>29</sup> Karon, hinumdumi, mahimo n’yo lamang kini nianang higayona, ug nianang higayona lamang, human nga masulayan kamo pinaagi sa Pulong.

<sup>30</sup> Gisulayan man kaniadto si Abraham pinaagi sa Pulong. “Motoo ka ba, Abraham, nga makabaton ka og anak?”

“Oo.”

<sup>31</sup> Sa miabot na ang anak. “Karon patya siya. Nagatoo ka ba gihapon niini, Abraham?”

<sup>32</sup> “Nagatoo ko niini, sa gihapon, kay mahimo Mo man nga banhawon siya gikan sa mga patay.”

<sup>33</sup> Ug human niadto, Siya miingon, “Karon, ang imong Binhi manag-iya sa ganghaan sa kaaway niini.” Amen! Human nga miabot ang pagsulay!

<sup>34</sup> Susihon ta ang pipila sa binhi ni Abraham, sa natural nga binhi. Nga, kita sa karong panahon mao ang espirituwal nga Binhi. Pero hibaloon sa nato, pinaagi sa natural nga binhi, ang

pipila kanila nga mitoo sa tibuok saad sa Dios, ug wala gayud nagkuwes- . . . [Blangko nga bahin sa teyp—Ed.]

35 Ingon ko, “Lain pa’y ato, para sa unsa ba nga gustong ipakita sa usa ka Cristohanong babaye ang iyang pang-ilalum nga sapot? Dili ko gayud kana masabtan.”

36 Natawo na kamo pag-usab, sa Dios, anaa kaninyo ang kaanyag sa Espiritu Santo aron ipakita kung unsa kamo. Kamo, aduna kamo og kaligdong nga wala sa niining mga scandal skirt, tinuod, ang usa ka tinuod nga babayeng iya sa Dios, nga nagabarug nga may kaligdong, tingali’g kataw-an kamo, ug tawgon nga kinaraan; pero aduna kamo’y usa ka butang nga dili nila arang matandog, ug naiwala na nila kini ug dili na gayud nila kini maangkon pag-usab. Tinuod kana. Aduna kamo’y kaligdong. Mao kana ang ginapangita sa Dios, ang kaligdong. Kita n’yo?

37 Apan ang unang butang, kung aduna gani pagduhaduha sa inyong hunahuna, nan ayaw gyud ninyo buhata kana. Ayaw kamo pagduol diha sa linya sa pagpaampo kung aduna ma’y pagduhaduha sa inyong hunahuna. Ayaw kamo pagduol gawas kon bug-os kamo nga nagatoo niini, nga hugot gayud, nga wala gayu’y pagduhaduha sa inyong hunahuna, nga unsa man, kondili mamaayo gyud kamo, kung ingon-ana monaug kamo sa niining entablado nga himsog na nga tawo. Husto kana, pag wala gayu’y pagduhaduha sa inyong hunahuna, nga unsa man. Kinahanglan ninyong toohan ang Dios, dili nga nagpakaaron-ingnon lang nga nagatoo. Kondili nagatoo gayud!

38 Ug nagatoo niini ang Binhi ni Abraham tungod kay mao kini ang giingon sa Pulong, ug mao kana’y hinungdan nga ato kining ginatoohan. Dili tungod kay adunay nanaway, o tungod kay mao kini ang gisulti ni kinsa pa man. Kondili tungod kay mao kini ang gisulti sa Dios, nga nagapahimo niini nga Kamatuoran. Pag ang Dios na ang mosulti niini, matubag na ang tanang mga pangutana. Siya man mao ang kinatapusan nga pulong. Siya mao ang pinakabasihanan. Pagmosulti ang Dios og unsa mang butang, mao na kana. Wala na’y bisan unsa pa man nga makasulti og batok Niini. “Ang matag pulong sa tawo bakak, ug ang sa Ako mao’y Kamatuoran.”

39 Karon samtang ginasusi nato ang pipila sa niini nga mga binhi, mamalandong kita. Palandungon nato ang Hebreohanong mga anak, nga akong naisulat dinhi, samtang namalandong ko bahin niadto, mahitungod sa Hebreohanong mga anak, human nga gisulayan sila batok sa pagsimba sa larawan. Karon, hinumdumi n’yo, miingon ang hari, “Ang si kinsa man nga dili moyukbo niini nga larawan, itambog ngadto sa nagdilaab nga hudno.” Karon, mitoo kini nga mga anak nga ang Pulong sa Dios husto, nga dili sila angay’ng mosimba sa unsa mang matang

nga larawan, mao nga pag-abot na nila sa pagpakigsangka ug gisulayan sila kung buhaton ba nila.

<sup>40</sup> Sa dihang, ang tanang uban pa nga mga kaanakan didto midawat na ug nanagsimba, nagpadayon ra sila mismo sumala sa gisulti sa hari. Miuyon sila sa popular nga panghunahuna niadto nga panahon, nga kinahanglan kono nilang buhaton kadto.

<sup>41</sup> Ug sa dihang gisulayan ang maong mga anak, kung sila ba'y mosimba sa mga larawan ug supakon ang Pulong sa Dios, nagpabilin gyud sila nga matinud-anon sa Pulong. Bisan unsa pa ang mga kahintang, nagpabilin gyud sila nga matinud-anon sa Pulong. Ug sa dihang gitambog na nila sila ngadto sa nagdilaab nga hudno, natuman mismo ang saad sa Dios. Gipanag-iyá nila ang mga ganghaan sa ilang kaaway. Ug dihay ikaupat nga Tawo nga nagatindog didto, nga may yawi nga nagpawala sa kainit sa kalayo, ug wala gyud kadto'y nahimo gawas sa pagpahigawas kanila. Amen.

<sup>42</sup> Pag ang usa ka lalaki o usa ka babaye nga andam gayud nga modawat sa pagsulay, sa magpamatuod nga pagsulay!

<sup>43</sup> Nakita n'yo, gikinahanglan nila nga moadto sa kalayo. Ug sa pag-adto nila, atua na sila mismo sa kalayo, ug ang bugtong butang nga nahitabo, igo lamang gibadbad niadtong nagdilaab nga pagsulay, gitangtang ang—ang mga higit sa ilang mga kamot.

<sup>44</sup> Sa makadaghang higayon, ginatugot sa Dios kanato, pag nagapos pa kita og ayo sa kalibutan, sa nagapos pa, ginatugot Niya nga moabot kanato ang nagdilaab nga mga pagsulay, kon diin gikinahanglan na natong magdesisyon. Ug pag buhaton nato kana, ang bugtong butang nga mahimo sa pagsulay, pag ang usa ka tinuod nga Binhi ni Abraham anaa na sa—sa kinasang-an nga dalan sa pagdesisyon, ug magdesisyon siya nga moalagad sa Dios, ang mahimo lang niini mao ang putlon ang mga higit ug himoon kitang gawasnon. Mahimong hatagan ka ni Satanas og balatian. Mahimong hatagan ka niya og ingon-aning butang, o unsa pa man. Pero unsaon man nimo pagkahibalo kon dili ba ang Dios ang nagpahimutang kanimo sa maong kinasang-an nga dalan, para makita kung unsa nga matang sa—sa—sa desisyon ang imong himoon?

<sup>45</sup> Gipanag-iyá gyud nila ang ganghaan sa kalayo. Dili sila mahimong sunogon sa kalayo. Wala man lang gani og baho sa kalayo nga mitapot kanila, tungod kay nasayod sila nga sila'y Binhi ni Abraham, ug mibarug sila alang sa Dios ug sa Iyang Pulong. Gipanag-iyá nila ang—ang mga ganghaan sa kaaway, ug dili sila mahimong sunogon sa kalayo, tungod kay gipanag-iyá man nila ang mga ganghaan.

<sup>46</sup> Human niadto, may usa ka lalaki, usa ka propeta didto, nga ginganla'g Daniel. Siya'y . . . gisulayan kung moalagad ba siya sa usa ka tinuod nga Dios, o dili. Ug sa dihang miabot na kadtong



higayona, kung siya ba'y moalagad sa usa ka tinuod nga Dios, o mosimba sa usa ka pagano nga diosdios, pero nagdumili siya nga mosimba niadto; ug giwahing ang mga kurtina, ug nag-ampo sa iyang Dios, matag adlaw. Ug gidakop siya tungod niadto, gisilotan sumala sa federal nga kabalaoran, ug gitambog ngadto sa langub sa mga leon. Usa gud ka pundok sa gutom nga mga leon ang nagnulob sa iyaha. Unsa ma'y gibuhat niya? Gipanag-iya niya ang ganghaan sa iyang kaaway. Dili siya mahimong kaonon sa mga leon. Tungod nga nagpadala man ang Dios og Haliging Kalayo, usa ka Manulonda nga mitindog tali kaniya ug sa leon.

<sup>47</sup> Gipanag-iya niya ang ganghaan sa kaaway, tungod kay gisulayan siya para makita kung mosimba ba siya sa usa ka tinuod nga Dios, o magkaaduna og usa ka dosena nga mga paganong diosdios nga iyang simbahan. Tuod man nasagubang niya ang pagsulay, ug gipanag-iya niya ang ganghaan sa kaaway. Wala gani makatandog kaniya ang leon, tungod kay kauban man niya ang Dios. Nagpabilin nga tinuod ang saad sa Dios, kay siya usa man ka tinuod nga Binhi ni Abraham.

<sup>48</sup> Si Moises, oh, usa na usab ka halangdong tawo. Siya gisulayan man, usab, aron makita ang saad nga gihatag sa Dios kaniya. "Ako magauban kanimo pag moadto ka na didto." Ug sa dihang mitindog siya sa atubangan sa mga manunundog sa iyang gasa, si Jannes ug si Jambres misulay sa pagtindog didto ug gisundog-sundog ang mismong butang nga gisugo kang Moises nga buhaton. Ug gitawag man siya sa Dios, mao nga nasayod gyud siya nga siya mao ang gisugo para buhaton kadto, ug mitindog siya didto ug nagbuhat og milagro maingon sa gisulti sa Dios kaniya nga buhaton. Ug atua pud nagatindog didto ang mga manunundog, para buhaton ang mao gihapong butang, apan wala kadto nakapabalaka kang Moises. Mibarug hinoon siya nga matinud-anon sa Pulong sa Dios, ug iyang gipanag-iya ang mga ganghaan, amen, sa kaaway, tungod kay mibarug man siya nga matinud-anon sa saad sa Dios, bisan kinsa pa ang naninguhang sundogon kadto.

<sup>49</sup> Pagkadakung leksyon kana para sa matag Cristohanon! Pag motan-aw kamo sa palibot ug makakita og usa ka tigpakaaron-ingnon, hinumdumi lang ninyo nga gapaninguha ra siya nga magsundog-sundog sa usa ka tinuod nga butang. Pero, nagapasabot lang kana nga aduna gyu'y usa nga tinuod. Mao nga barug kamo nga matinud-anon sa Pulong sa Dios! Bisan unsa pa ang mahitabo, pagpabilin kamo sa Iyang saad. Oo, ngani si Daniel nagpabilin mismo nga matinud-anon sa Pulong sa Dios.

<sup>50</sup> Bisan unsa pa kadaghan ang naninguhang sundog-sundogon siya, ug tanan nang uban pa, nagpabilin gyud siya nga matinud-anon. Ug miadto siya didto alang sa usa ka katuyoan, para kuhaon ang Israel pagawas sa Egipto, ug dalhon sila paingon sa yutang saad. Ug sa miabot ang panahon nga nagpaingon na sila sa yutang saad, pagawas sa Egipto, atua didto nagbabag ang

Dead Sea. Ug iyang gipanag-iyang ang mga ganghaan sa tubig, ug naabli gayud ang mga ganghaan. Ug ang—ang katubigan misibog, ug gidala ni Moises ang Israel paingon sa kamingawan, paingon sa bukid kon diin ang gisugo sa Dios kaniya nga pagadalhan kanila. Amen. Gipanag-iyang niya ang mga ganghaan sa kaaway.

<sup>51</sup> Ang iyang amahan, si Abraham, ang nakabaton niadto nga saad, nga ang iyang tinuod nga Binhi magapanag-iyang sa ganghaan sa kaaway. Ug sirado kaniadto ang mga ganghaan sa tubig, ug dili siya makalabang, ug mao man kadto ang dalan sa pangatungdanan. Ingon nga kinahanglan niyang dalhon ang mga kaanakan ngadto sa maong bukid. Mao ma'y gisulti sa Dios kaniya. Ug atua didto nagbabag ang ganghaan, ug gipanag-iyang gyud niya ang ganghaan sa kaaway.

<sup>52</sup> Si Josue, wala magdugay human niadto, kaniadtong miabot na sila sa Kadesh-barnea, nga mao ang lingkoranan sa paghukom sa kalibutan niadtong panahona, didto giatubang sa Israel ang paghukom niini. Nasayran nato nga si Josue kauban si Caleb, ug ang uban pa nga dose. . . o—o ang uban pang napulo. Usa gikan sa matag banay ang gipadala aron maniid sa maong yuta nga andam na nilang dawaton.

<sup>53</sup> Ug sa pagkakita nila niadtong dagkung mga higante nga nanagtindog didto, nadiskurahi gayud ang napulo kanila, ingon sila, “Dili nato kini maangkon. Daku ra kaayo kini. Grabe, tan-awa ninyo ang atong kaaway.” Mao nga sa pagbalik nila aron ihatud ang balita, dili na maayo nga balita ang dala nila.

<sup>54</sup> Nganong dili man maayo nga balita ang dala nila, kung gisultihan na sila sa Dios, “Gihatag Ko na sa inyo kanang yutaa; inyoha kana”? Gisultihan na Niya sila didto pa sa Egipto, “Gihatag Ko na sa inyo kanang yutaa, usa kana ka maayong yuta, nga nagapaagay kana og gatas ug dugos.”

<sup>55</sup> Apan sa pagkakita nila nga dagku kaayo ang kaaway, napulo kanila ang namalik ug miingon, “Dili gyud nato mahimo kini.”

<sup>56</sup> Pero ania si Josue, gipapahilum niya ang mga tawo, ug miingon, “Labi pang may kasarang kita nga panag-iyahon kini. Labi pang may kasarang kita!” Kay ngano man? Nagalantaw man siya sa saad. Usa siya ka tinuod nga Binhi ni Abraham. Bisan unsa pa ang kaaway, “Mapanag-iyang gyud nato ang ganghaan, tungod kay gisaad na man sa Dios ang yuta.” Ug gipanag-iyang niya ang ganghaan.

<sup>57</sup> Human niadto, sa dihang gidala niya ang mga anak sa Israel didto na sa suba. Atua didto, niadtong bulan sa Abril, ang dakung suba, nga nagalapaw. Nagaawas ang tubig sa Jordan gikan sa mga kabukiran, ug nagaawas kini ngadto sa mga kapatagan. Mao nga daw sa mao kadto ang pinakadili-maayo nga panahon, sa tuig, nga atua siya didto. Pero, bisan pa niadto, siya'y Binhi gyud ni Abraham. Nasayod siya nga nakabaton

siya sa saad, ug atua siya kaniadto sa linya sa pangatungdanan. Gihatagan siya sa Dios og usa ka panan-awon, kung unsaon pagbuhat niadto, ug gipanag-iya niya ang mga ganghaan sa suba. Sa diha nga naabli ang mga ganghaan, mibalik ang tubig paingon sa kabukiran. Ug gipanag-iya ni Josue ug sa Israel ang mga ganghaan sa kaaway, ug milabang paingon sa yutang saad, tungod kay gisultihan man sila sa Dios nga buhaton kadto. Tinuod gayud nga Binhi ni Abraham!

<sup>58</sup> Mga igsoong lalaki ug mga igsoong babaye, sa pag-abot niya didto, napalibotan og paril ang Jerico, nga ingon gayud ka habog nga mahimo nilang magpadagan og tulo ka carro sa ibabaw niadto. Unsaon kaha sa mga Israelita pagsulod niadto gamit ang hinulam, pinunit nga mga espada, ug tanan na, ug mga sungkod ug mga bato, unsaon man nila pagsulod didto? Apan siya'y Binhi man gihapon ni Abraham. Gihatagan siya sa Dios og panan-awon, gisultihan siya kung unsaon pagbuhat niadto, ang ingon, "Magpatingog ka og trumpeta." Amen. Kana lang. "Suminggit ka, og magmartsa paingon sa paril, og mahugno ang mga ganghaan sa atubangan mo." Amen! Usa siya ka Harianong Binhi ni Abraham, siya'y tinuod gyud nga magtotoo sa Dios. "Mahugno ang mga ganghaan sa atubangan mo mismo. Basta singgit lang, ug patingoga ang trumpeta. Mao lang kana ang kinahanglan mong buhaton." Ug unsa ma'y nahitabo? Nahugno gayud ang mga ganghaan, ug gisakop ni Josue ang maong siyudad.

<sup>59</sup> Wala magdugay human niadto, nasayran nato nga napildi na ang kaaway ug nangalagiw na, pagkahuman niadto, ug gipahunong pa gani niya ang adlaw sa pagtuyok niini. Maingon sa ako nang gikasulti niadtong miaging buntang mahitungod sa *Paradox*, nga gipahunong niya ang adlaw hangtud nga napanag-iya niya ang mga ganghaan sa iyang kaaway. Amen. Nasayod siya nga kung magkatigum-tigum pag-usab ang kaaway, ingon nga nangakatag-katag na man sila, ug pasalop na niadto ang adlaw, ug ang mga Amorehanon, ug ang mga Amalekanhon, ug uban pa, nangakatag-katag man, kung magkatigum-tigum sila pag-usab, ug maghiusa, nan maglisud na siya nga pildihon sila pag-usab. Ug aduna lang ma'y usa ka butang nga makapugong, kadto mao ang oras, ug mao nga gipahunong niya ang oras. Amen! Amen! Adunay usa ka butang nga nakababag kaniya sa saad, kadto mao ang adlaw, ang kinaiyahan mismo nga nagasalop na, ug iyang gipahunong ang kinaiyahan. Ngano man? Usa siya ka Binhi ni Abraham. Mitoo siya sa saad sa Dios. Gipahunong niya kadto, ug gipanag-iya ang mga ganghaan. Oo, sir.

<sup>60</sup> Kining halangdong kalalakin-an, silang tanan mga halangdon man nga kalalakin-an. Pero kabalo mo sa dihang sila, ang matag usa kanila, sa pagdangat nila sa ganghaan sa kamatayon, namatay silang tanan. Ang matag usa kanila

kinahanglan nga mamatay. Kay sila ingon nga mga gamhanang kalalakin-an, “Ilang gipatak-up ang—ang baba sa mga leon, ug nakalikay sa kalayo, ug sa sulab sa espada,” ug uban pa, sumala sa gikasulti sa ato diha sa Mga Hebreohanon 11. Ug gipanagiya nila ang mga ganghaan sa kaaway, ang tanan-tanan gawas lang sa usa ka kaaway, ug kana mao ang kamatayon. Gilamoy sa kamatayon ang matag usa kanila.

<sup>61</sup> Dayon usa niana ka adlaw, miabot ang Harianong Binhi ni Abraham, si Jesus Cristo, ang Anak sa Dios; ang Binhi ni Abraham, pinaagi sa pagtoo. Dili pinaagi ni Isaac, nga natural nga binhi; gibuhat nila ang ilang bahin. Pero ania miabot ang Usa Nga wala gipanganak sa natural. Ania ang Usa nga wala miabot pinaagi’g pangibog sa pakighilawas. Ania ang Usa nga miabot pinaagi sa ulay nga pagkahimugso. Ang Anak sa Dios, ang Binhi ni Abraham, pagkahalangdon gayud niini nga Lalaki! Ang tanan nga mga natural gipanganak man sa natural nga mga pagkahimugso. Pero kini nga Lalaki natawo sa ulay nga pagkahimugso. Unsa ma’y gibuhat Niya kaniadtong mianhi Siya sa yuta? Gibuntog Niya ang matag kaaway nga iya ni Satanas. Gibuntog Niya ang tanan-tanan.

<sup>62</sup> Unsa ma’y gibuhat Niya? Mianhi Siya ug gibuntog Niya ang balatian. Dili gani mahimong magkaaduna og balatian sa taliwala Niya; kon diin adunay balatian, gibuntog Niya kini. Unsa ma’y gibuhat Niya pagkahuman Niya nga gibuntog kini? Gihatag Niya kanato ang mga yawi, amen, nga nagaingon, “Unsa ma’y inyong pagabugkoson sa yuta, pagabugkoson Ko kini sa Langit.” Oh! Amen! Mao kana ang Harianong Binhi ni Abraham, ang Iyang saad. Ang Balaang Espiritu ania kanato karon, nga dala ang mga yawi, ginagunitan kini batok sa balatian. Gibuntog na Niya ang balatian. Mao nga dili makapabilin ang balatian diha sa Iyang Presensiya. Ug Siya miingon nga gihatag Niya kanato ang mga yawi aron buhaton ang mao gihapon nga butang, buntogon ang balatian. “Unsa ma’y inyong pagabugkoson sa yuta, pagabugkoson Ko sa Langit.”

<sup>63</sup> Ingon niana usab, ang tentasyon, gitintal Siya sa tanan nang paagi nga sama kanato. Unsa ma’y gibuhat Niya? Gibuntog Niya kini. Ug unsa ma’y gisulti Niya sa ato? “Sukli ninyo ang yawa, ug siya mokalagiw gikan kaninyo.” Gibuntog na Niya ang balatian alang kanato. Gibuntog na Niya ang tentasyon alang kanato, giguba ang mga ganghaan; gikuha ang yawi gikan sa maninintal, ug gihatag kini ngadto sa magtotoo, nga Binhi ni Abraham, ug miingon, “Kung tintalon niya kamo, sukli ninyo siya, ug siya mokalagiw gikan kaninyo.” Oh, grabe! Sukli n’yo siya!

<sup>64</sup> Pareho Niyang gibuntog ang kamatayon ug ang impiyerno. Nabanhaw Siya sa ikatulong adlaw, nga nagaingon, “Nagmadaugon Ako. Ug tungod kay Ako buhi, kamo usab mabuhi.” Oh, pagkaanindot nga saad! Para kana sa Binhi ni Abraham. Gibuntog Niya ang lubnganan, og nabanhaw sa

ikatulong adlaw, alang sa pagpamatarung kanato. Sa diha nga nabanhaw Siya, Siya mao ang atong pagpamatarung. Unsa ma'y nahimo niana kanato? Gibuntog Niya ang balatian. Gibuntog Niya ang kamatayon. Gibuntog Niya ang impiyerno. Gibuntog Niya ang lubnganan. Gibuntog Niya ang tentasyon. Oh!

65 “Karon kita labaw pa ka mga mananaug pinaagi Kaniya nga nahigugma kanato, ug nagtugyan sa Iyang kinabuhi,” ingon nga Harianong Binhi ni Abraham. Pinaagi sa mao ra nga Espiritu sa Dios nga ania kanato, nga anaa Kaniya, kita labaw pa ka mga mananaug. Ang matag ganghaan nabuntog na para kanato. Ang butang lamang nga kinahanglan natong buhaton mao ang panag-iyahon kini. Nabuntog na man kini. Nabuntog na ang balatian. Nabuntog na ang kamatayon. Nabuntog na ang impiyerno. Nabuntog na ang lubnganan. Ang tanan-tanan nabuntog na, ug ginagunitan na nato ang mga yawi, pinaagi sa Iyang grasya. Nahadlok ba kamo nga isulod ang mga niini sa kandado, ug moingon, “Nagaduol ako sa Ngalan ni Jesus Cristo”? “Pangayo kamo sa Amahan og bisan unsa sa Akong Ngalan.” Gihigugma ko Siya.

66 Ngani duha na ka libo ka tuig ang milabay, duha ka libo ka tuig, ug hangtud karon ania Siya sa gihapon sa atong taliwala, ang Gamhanang Mangdadaug nga migilis sa tabil sa duha, nga miangkon sa matag sakit, matag balatian, og tanan na sa Iyang Kaugalingon, ug gipas-an ang atong mga kaluyahon ngadto sa krus, ug ang atong mga sakit ug ang atong mga balatian, ug gidaug ang mga niini, ug nabanhaw alang sa pagpamatarung kanato, ug nagapabilin mismo nga buhi human sa duha ka libo ka tuig, aron ipadayag ang Iyang Kaugalingon ingon nga usa ka buhi nga Jesus Cristo, sa taliwala sa Harianong Binhi ni Abraham, nga mga manununod sa tanang mga butang. Oh, grabe! Sila nga pagkahuman, nga miagi sa pagsulay, nga saad sa Pulong! Kung mahimo ninyo nga toohan ang Pulong, nan kamo'y Binhi usab ni Abraham. Sa ingon nianang paagi kamo makaduol Niini.

67 Pero kung dili ninyo madawat ang pagsulay tungod sa Pulong, kung ginaduhaduhaan n'yo Kini, medyo nagduhaduha kamo Niini, nga dili gyud kamo halos makatoo Niini, adunay usa ka butang o unsa man, nga dili kamo makatoo Niini, kung ingon niana ayaw kamo pagduol sa linya sa pagpaampo. Gani dili man ko moduol sa altar, hangtud nga makaangkon kamo og igong grasya aron masayod nga ang Pulong sa Dios tinuod.

68 Ug pag makalusot na kamo nianang tabil sa dili-pagtoo, kung ingon-ana maangkon na ninyo diha sa inyong mga kamot ang mga yawi, sa kamatayon, impiyerno, ug sa lubnganan, tungod kay aduna man kamo og usa ka Mangdadaug Nga nangbuntog para kaninyo. Dayon aduna pud kamo og Mga Hebreohanon 13:8, nga nagasulti kanato, “Si Jesus Cristo mao

sa gihapon kagahapon, karon, ug hangtud sa kahangturan.” Unsaon man nato pag-angkon niini?

<sup>69</sup> Nagaingon ang mga tawo sa karong panahon, “Oh, bueno, sultihan ta ka, Siya sa usa—usa ra ka aspeto, ingon niana Siya.”

“Siya mao man sa gihapon,” ang ingon sa Biblia.

“Oh, bueno, pero dili na man Niya ginabuhat sa karong panahon ang sama sa Iyang gipangbuhat kaniadto.”

<sup>70</sup> Makita man nato karon, sa dihang atong makita ang Iyang Pulong nga gipanghimatud-an. Unsa ma’y ginabuhat niini? Ginabalik Niini Kini mismo sa ilang sabakan pag-usab. Amen.

<sup>71</sup> Pero ang tinuod nga Binhi ni Abraham nagatoo gyud Niini. Naila nila Kini. Ug ania Siya, karong gabhiona, maingon nga gihinagbo Niya si Abraham didto kaniadtong mga adlaw ni Lot ug gibuhat kadto nga milagro, sama sa Iyang gibuhat sa pagsulti kang Sarah kung unsa ang gisulti niini sa luyo Niya. Gisaad ni Jesus, sa Harianong Binhi ni Abraham, nga makita sa Iglesia ang mao gihapong butang sa dili pa ang Iyang Pag-abot. Unsa man kini? Siguradong mahitabo gyud kini. Ingon nga gisaad kini sa Dios. Gipanghimatud-an kini ni Jesus Cristo ug miingon nga mamaingon gayud kini, ug ania kita karon, human sa duha ka libo ka tuig, nakita Siya sa atong taliwala, nga mao sa gihapon nga Gamhanang Mangdadaug! Gibuntog Niya ang kamatayon, impiyerno, lubnganan, ang tanang too-too; gikuha ang Pulong . . . ? . . . kaniya. Oo.

<sup>72</sup> Siya miingon, “Kung nagapabilin kamo Kanako, ug ang Akong mga Pulong anaa kaninyo, pangayo kamo sa bisan unsa nga buot ninyo ug kini igahatag alang kaninyo.” Unsa man kini? Ang Pulong, si Cristo, Nga anaa sa kinasuloran sa inyong kasingkasing. “Kung nagapabilin kamo Kanako, ang Akong mga Pulong nagapabilin kaninyo, kung ingon-ana nabuntog n’yo na ang tanang butang kay gibuntog Ko na kini alang kaninyo. Kung nagapabilin kamo Kanako, kung makasabot kamo Kanako, kung makapabilin kamo Kanako. Ang nagatoo Kanako, nga midawat Kanako; dili nga patoo-too lamang, kondili makadawat gayud. Siya nga nagapatalinghug sa Akong mga Pulong, nakasabot sa Akong mga Pulong, ug nagatoo Kaniya nga nagsugo Kanako, adunay Kinabuhing walay katapusan; ug dili na moagi sa tentasyon, o sa paghukom, kondili miagi na gikan sa kamatayon ngadto sa Kinabuhi.” Mao kana Siya, ang Gamhanang Mangdadaug!

<sup>73</sup> Ania man Siya karon, nga mao sa gihapon kagahapon, karon, ug hangtud sa kahangturan. Ania Siya nga nagapamuhat sa atubangan sa Binhi ni Abraham, nga gitawag pagawas sa Babilonia, gitawag pagawas sa Sodoma, gitawag pagawas sa kalibutan, ug gihimulag, nga ginapakita mismo ang Iyang saad nga tinuod gayud. Human sa duha ka libo ka tuig, ania Siya mismo sa atong taliwala, karong gabhiona, ang maong

Gamhanang Mangdadaug, ang Pulong sa Dios Nga makatugkad sa mga hunahuna nga anaa sa kasingkasing, ug sa mga katuyoan niini. Unsa man kini? “Ang imong Binhi manag-iya sa mga ganghaan sa kaaway niini.” Unsa man kini? Kini mao ang Binhi ni Abraham, ang Harianong Binhi, nga nagatoo sa Pulong. Ug ang Pulong mao—ang Pulong mao ang Dios.

<sup>74</sup> Bueno sa diha nga masaksihan nato kini, makasinggit gyud kita uban kanila, sama sa magbabalak kaniadto:

Sa buhi pa, gihigugma Niya ako; sa  
pagkamatay, giluwat Niya ako;  
Sa paglubong, gidala Niya palayo ang akong  
mga sala;  
Sa pagkabanhaw, Iya akong gimatarung nga  
walay-bayad hangtud sa kahangturan:  
Sa umalabot nga adlaw Siya moabot—oh,  
mahimayaon gayud nga adlaw!

<sup>75</sup> Adunay miingon, “Nagakatigulang na man ka, dong.” Dili ko kana mapunggan.

<sup>76</sup> Nagkinabuhi na ako sukad niadtong usa pa ako ka gamay’ng batang lalaki, ang bugtong kalampusan nga maangkon ko mao ang makita ang Pag-abot ni Jesus Cristo. Gitugyan ko ang akong kinabuhi alang niana nga katuyoan. Ania gihapon ako sa pulpito, nga usa na ka tigulang nga lalaki, pero nagatoo gyud ako sa mao gihapon nga Estorya, ug ang pinakamahimayaong butang nga mahunahuna ko mao ang makita si Jesus Cristo nga nagaabot gikan sa kalangitan aron dawaton ang mga Iyaha Mismo. Ang Dios, kung ingon-ana ang akong. . . Dili ikatingala nga makaawit kita:

Ang tanan maghimaya sa gahum sa Ngalan ni  
Jesus!  
Ang mga Manulonda mangyukbo ug  
manghapa;  
Dalhon ang harianong purong-purong,  
Ug purong-purongan Siya ang Ginoo sa tanan.

<sup>77</sup> Ngano man? Siya mao ang Gamhanang Mangdadaug. Kung anaa kamo Kaniya, anaa kamo sa Pulong. Ang ingon Niya, “Kung nagapabilin kamo Kanako, pangayo kamo sa bisan unsa nga buot ninyo.” “Sa bisan unsa nga buot ninyo,” kay ang matag ganghaan nabuntog na man. Kung ingon-ana mahimo natong isulti:

Kay ang matag saad diha sa Basahon akoo,  
Matag kapitulo, matag bersekulo, ug linya.  
Ako nagasalig sa Iyang Balaanong Pulong,  
Kay ang matag saad diha sa Basahon akoo.

<sup>78</sup> Mga higala, naamgo ba ninyo kung unsay buot ipasabot niana? Ang matag saad nga gisaad sa Dios kang Abraham kaniadto, matag saad nga gipamulong sa mga propeta, matag

saad nga gisaad ni Jesus Cristo alang niini nga panahon, ania Siya mismo aron panghimatud-an kini ug para ipakita nga Siya'y buhi hangtud sa kahangturan. "Ang imong Binhi manag-iya sa ganghaan sa mga kaaway."

<sup>79</sup> Pag-abot na sa oras sa kamatayon. Moingon mo, "Unsa man diay kana?" Aduna sa gihapon kamo nianang Pagpanag-iya nga gikasulti ni Pablo. "Oh lubnganan, hain na ang imong pagdaug? Oh kamatayon, hain na ang imong ikot? Apan salamat sa Dios, Nga naghatag kanato og pagdaug pinaagi sa Gamhanang Mangdadaug, si Jesus Cristo." Oh!

Ang mga Manulonda mangyukbo ug manghapa;  
Dalhon ang harianong purong-purong,  
Ug purong-purongan Siya ang Ginoo sa tanan.

<sup>80</sup> Karong gabhiona, human niadtong duha ka libo ka tuig, ania kita aron makita Siya, karon, ang Gamhanang Mangdadaug Nga migilis sa tabil nga nagpahimulag kanato gikan sa unsa man nga saad sa Dios, ug kita labaw pa ka mga mananaug diha Kaniya. Mag-ampo kita.

<sup>81</sup> Langitnong Amahan, samtang nagatindog kami dinhi, karong gabhiona, sa Presensiya sa Espiritu Santo, ang gamhanang Persona ni Jesus Cristo diha sa porma nga Espiritu, Nga gikasaad nga moabot sa Binhi ni Abraham, ang Harianong Binhi, ginaampo namo, Oh Dios, nga kung aduna ma'y lalaki o babaye, batang lalaki o batang babaye, nga ania karon, nga wala pa nakaila Kanimo, basin aduna sila'y pagduhaduha ug mga kalibog diha sa ilang hunahuna, mahitungod sa Pulong sa Dios, kung Kini ba'y Kamatuoran o dili, Oh Gamhanang Dios, Nga mao'y nagsaad, umanhi Ka karong gabhiona! Adunay usa ka halangdong saad nga Imong gisaad, Ginoo, og tumanon Mo man kana nga saad, miingon Ka, "Ang nagatoo Kanako, ang mga buhat nga Akong ginabuhat pagabuhaton usab niya; labaw pa niini ang iyang pagabuhaton, kay moadto man Ako sa Amahan." Amahan nga Dios, ginaampo namo nga panghimatud-an Mo ang Imong Pulong.

<sup>82</sup> Daghan sa mga anak ni Abraham ang ania karong gabhiona, nga mga may sakit. Oh, ginatrangkahan sila sa yawa; ilang gibilanggo sila sa sulod, ug ilang gipangkandado ang mga yawi, ug miingon, "Bueno mamatay gyud ka; aduna ka'y sakit sa kasingkasing. Aduna ka'y *ingon-ani*, *ingon-ana*, o *uban pa*, ug mamatay gyud ka."

<sup>83</sup> Oh Dios, hinaut nga motingog ang pang-jubileo nga trumpeta, sa Ebanghelyo, karong gabhiona, aron ang matag ulipon mamahimo nang gawasnon! Gibuntog na man ni Jesus Cristo ang mga ganghaan. Ania na sa among mga kamot ang mga yawi. Oh! "Sa Akong Ngalan pagahinginlan nila ang mga yawa. Kung mangayo kamo sa Amahan og bisan unsa sa Akong



Ngalan, buhaton Ko Kini. Ang nagatoo Kanako, ang mga buhat nga Akong ginabuhat pagabuhaton usab niya. Ang Pulong sa Dios labi pang mahait ug mas gamhanan kaysa espada nga duhay-sulab, nga nagadulot hangtud sa kinauyokan, ug usa ka magtutugkad sa mga hunahuna nga anaa sa kasingkasing.”

<sup>84</sup> “Ug maingon sa nahitabo kaniadto sa mga adlaw ni Noe, mao man usab ang mahitabo sa pag-abot sa Anak sa tawo, kay nanagpangaon sila, nanag-inom, nanagpangasawa, nanagpamana; nanagtukod og dagkung mga programa.” Ug makita namo sa kalibutan, “Magkaaduna og mga ilhanan, makahahadlok nga mga talan-awon diha sa langit sa ibabaw (kini mao ang mga flying saucer), mga linog sa nagkalainlaing mga dapit, ang dagat magadaguok (mga tidal wave), ang kasingkasing sa mga tawo mangaluya (sa kahadlok), kagul-anan sa kanasuran, panagkalibog sa panahon.”

<sup>85</sup> “Ug maingon sa nahitabo kaniadto sa mga adlaw ni Lot, mao man usab ang mahitabo sa pag-abot sa Anak sa tawo.” Oh Dios, umanhi Ka karong gabhiona ug ipamuhat ang Imong Pulong, umanhi Ka karong gabhiona ug pasidunggi ang pagtoo sa mga anak ni Abraham. Pinaagi sa Ngalan ni Jesus Cristo amo kining ginapangamuyo. Amen.

<sup>86</sup> Panalanginan kamo sa Ginoo, sa madagayaon gayud. Dili ako mohimo og pagtawag sa altar karong higayona. Ibilin ko kini sa inyo. Nahunahuna ko nga, sa makadaghang higayon, ang mga pagtawag sa altar . . . nagatoo man ko niini. “Apan ang tanan nga nanagdawat, nagpabautismo.” Mao kana, “Daghan ang midawat Kaniya.” Mag-ampo na kita para sa mga may sakit.

<sup>87</sup> Mahimo kong mamulong dinhi sa tibuok gabii. Ingon nga mga buutan kamo nga tigpaminaw. Pero ang akong ginasulti iya lang man sa usa ka tawo; apan kung ang Iyang mga Pulong mao’y akong ginasulti, nan dili kini akong mga pulong, kondili Iya kining mga Pulong. Kung aduna ako’y isulti, ug dili kini pamatud-an sa Dios, nan ako ra kanang pulong. Pero kung ang akong ginasulti mao ang Iyang Pulong, ug ginapamatud-an Niya Kini, nan si kinsa man nga makasasala nga lalaki o babaye, batang lalaki o batang babaye, ang mohawa ra ug moingon nga Kini dili gyud ingon niana?

<sup>88</sup> Si Jesus, miingon kaniadtong gipamuhat Niya kining mga butanga, ang ingon nila, “Kining Tawhana usa ka manghihimalad. Usa Siya ka yawa!” Usa kono ka manghihimalad, nasayod man ang si bisan kinsa nga ang pagpanghimalad iya kana sa yawa. Ingon niya, “Usa Siya ka manghihimalad.” Apan nakakita na ba kamo og usa ka manghihimalad nga nagawali sa Ebanghelyo? Nakakita na ba kamo og manghihimalad nga nanghingilin og mga yawa? Wala pa, gayud, tungod dili man nila kana ginabuhat.

<sup>89</sup> Siya miingon, “Karon, Ako nga Anak sa tawo pagapasayloon pa kamo niini. Apan sa diha nga moabot na ang Espiritu Santo, ang pagsulti og batok Niini dili na gayud pagapasayloon niining panahona ni sa umalabot pa nga panahon, tungod kay pagtawag kana sa buhat sa Dios ingon nga mahugaw nga espiritu.”

<sup>90</sup> Ang Dios malooy unta kanato, karong gabhiona, ug nagaampo ko nga mokunsad unta ang Dios ug panghimatud-an kining Pulong sa atubangan ninyo.

<sup>91</sup> Igsoong lalaki, igsoong babaye, ako kining kalag. Sigurado gyud nga tagboon ko ang Dios. Tulubagon ko ang unsa man nga ginasulti ko kaninyo. Papanubagon man ko sa Dios tungod niini. Tinuod kana. Unsa ma’y kaayohan ang mahatag kanako kon motindog ko dinhi ug isulti kining mga butanga kung nasayod ko nga ginakondena ko diay ang akong kalag paingon sa impiyerno?

<sup>92</sup> “Adunay dalan nga daw matarung sa usa ka tawo, apan ang katapusan niini mao ang mga dalan sa kamatayon.” Ang Dios wala nagkinahanglan og tighubad. Sa gikaingon ko na, ginahubad Niya ang Kaugalingon Niyang Pulong.

<sup>93</sup> “Ang Binhi ni Abraham manag-iya sa ganghaan sa kaaway.” Nagatoo ba kamo niini?

<sup>94</sup> Kung mahimo ko lang nga ayohon kamo, buhaton ko gayud. Pero giayo na man kamo ni Cristo. Ang bugtong butang, anaa na sa inyong kamot ang yawi. Kana nga yawi mao ang inyong pagtoo, nga magakupot niini. Ablihi ninyo kini, karong gabhiona, mahimo n’yo ba? Samtang nagaduol Siya sa taliwala nato, ang Gamhanang Mangdadaug nga mibuntog sa matag balatian, ug mianhi ug gipakita kaninyo nga gibuhat na Niya kini, kay Siya man sa gihapon ang Pulong. “Ug ang Pulong usa ka magtutugkad sa mga hunahuna nga anaa sa kasingkasing.”

<sup>95</sup> Unsa na gani nga prayer kard? B, uno hangtud. . . Sa unsa man ta nagsugod, niadtong miaging gabii? [Adunay nagaingon, “Uno.”—Ed.] Magsugod kita sa singkwenta. Kinsa ma’y aduna og prayer kard B, singkwenta? Ipataas ang imong kamot. Prayer kard B. Nagsugod man ta sa uno, niadtong miaging gabii, karon magsugod na pud kita sa singkwenta, karong gabhiona.

<sup>96</sup> Kinsa ma’y aduna og B, B, singkwenta? Ipataas ang imong kamot. Prayer kard B, singkwenta. Buot n’yo bang ipasabot nga wala kini dinhi? Anaa ba kini sa imoha? Okey, B, singkwenta. B, singkwenta’y-uno, kinsa’y aduna niana? B, singkwenta’y-uno, sige. B, singkwenta’y-dos, kinsa ma’y aduna og B, singkwenta’y-dos? Okey, anaa sa imoha. B, singkwenta’y-tres, singkwenta’y-kuwatro, duol mo dinhi mismo. Singkwenta’y-kuwatro, singkwenta’y-singko.

<sup>97</sup> Mianhi dinhi ang anak kong lalaki, adisir pa ako misulod, ug nasagol-sagol niya ang daghang mga kard. Ug makita man ninyo kung unsa kini, may *usa* dinhi ug may *usa dinha*? Wala sila kabalo. Tingali’g moduol kamo dinhi *niini* nga laray ug nakuha

n'yo ang uno, ang sunod nakakuha sa diyos, ang usa na usab nakakuha sa baynte-singko. Wala kita kabalo kung asa kini, bueno, kung asa ba ang mga niini.

<sup>98</sup> Karon pila na man ang natawag nato? Lima, upat? B, singkwenta. B, singkwenta, di ba? [Adunay nagaingon, "Oo."—Ed.] B, singkwenta hangtud singkwenta'y-singko. Singkwenta'y-sais, singkwenta'y-siete, singkwenta'y-otso, singkwenta'y-nuebe, saisenta. Karon atong tan-awon, usa, duha...Ihapa sila, Billy, ug atong...Saisenta, setenta, patindoga una sila, kung mahimo. B, singkwenta hangtud setenta, setenta'y-singko. Ihapa sila, Igsoong Roy, palihog, samtang nagapakig-istorya ko sa mga mananambong.

<sup>99</sup> Pila man dinha karon kon motan-aw kamo sa niini nga direksyon, ug wala pa kamo'y prayer kard?

<sup>100</sup> Hinumdumi n'yo, nga miingon si Jesus, "Ang mga buhat nga Akong ginabuhar pagabuhaton usab ninyo." Tinuod ba kana? Tinuod gyud kana. Nagatoo ba kamo niana? Mao kana ang gisulti sa Binhi ni Abraham.

<sup>101</sup> Miingon ang Biblia, nga, "Siya mao ang Labaw'ng Sacerdote." Mga Hebreohanon, sa ika-4 nga kapitulo, "Siya mao ang Labaw'ng Sacerdote nga arang matandog sa pagbati sa atong mga kaluyahon." Nagatoo ba kamo niana? Ingon nga Siya mao sa gihapon kagahapon, karon, ug hangtud sa kahangturan, unsaon man Niya pagbuhat kana?

<sup>102</sup> Dunay usa ka luoy'ng babaye kaniadto, sa Biblia, samtang gapaminaw kamo sa akong ginasulti. Usa ka luoy'ng babaye, diha sa Biblia, tingali'g wala siya'y prayer kard; pero miingon siya sulod sa kasingkasing niya, "Kung mahikap ko lang unta kana nga Tawo, nagatoo ako Kaniya." Nagasto na niya ang tanan nga aduna siya, para sa dok- . . . sa mga doktor. Pero dili nila siya matabangan. Grabe na man kaayo ang iyang sakit. Dili nila siya matabangan. Apan mitoo ang maong babaye nga tabangan siya sa Dios. Ug tuod man nahikap niya ang Iyang borlas, sa Iyang bisti.

<sup>103</sup> Ug Siya miingon, "Gibati Ko nga may gahum nga migula Kanako." Husto ba kana?

<sup>104</sup> Nagatoo ba kamo nga Siya mao sa gihapon, karong gabhiona? Nagatoo ba kamo nga ania Siya? Pila man ang nagatoo nga Siya nabanhaw gikan sa mga patay? Karon sa unsa mang paagi ninyo mapamatud-an nga nabanhaw Siya gikan sa mga patay?

<sup>105</sup> Dili pa lang dugay, usa ka ilado nga lalaking Baptist ang miduol sa ako, ug miingon siya, "Igsoong Branham, napildi—napildi ako, usa ka higayon, sa usa ka Mohammedan nga nagsulti niana. Ang ingon niya, 'Kung nabanhaw gyud Siya, gisaad Niya nga Iyang buhaton ang mao gihapong butang. Tan-awon nato

kon mabuhat ba Niya kini.” Kita n’yo, nagatoo man gud sila nga wala Niya kadto buhata.

<sup>106</sup> Apan nagatoo gyud kita nga gibuhat Niya kadto. Nagatoo kita nga nabanhaw Siya gikan sa mga patay. Ngani wala na ma’y ubang relihiyon sa kalibutan ang makapamatuod nga ang ilang tigtukod buhi, gawas lang sa Cristianismo. Ug ang bugtong paagi nga mapanghimatud-an Kini sa Dios, mao’y pinaagi kanila nga nagatoo Niini, kay mao lang man kana ang paagi nga maipamuhat sa Dios ang Iyang mga Pulong, mao’y pinaagi sa mga nagatoo Niini.

<sup>107</sup> Karon samtang nagalinya sila dinhi niining gamay’ng linya sa pagpaampo, wala ko kabalo kung pila ang atong matawag, maong gusto ko nga ang matag usa kaninyo, magpabilin lang sa inyong nahimutangan, magpabilin lang sa inyong gilingkoran, ayaw na mo paglakaw-lakaw, tan-aw mo dinhing dapita ug mag-ampo, nga moingon, “Ginoong Jesus, nagatoo ako.”

<sup>108</sup> Hinumduman ninyo, gisultihan Niya ako, “Kung mapatoo mo lang ang mga tawo kanimo; ug dayon magmatinuuron lang sa dihang magaampo ka.” Nagapadayon kini dinhi sa tibuok nasud, ngadto nganhi, sulod sa kinse na ka tuig, og wala gyud ni usa ka higayon nga napakyas kini. Dili gayud Kini mahimong mapakyas.

<sup>109</sup> Ang Dios, ang usa ka butang nga dili mahimo sa Dios, kana’y ang mapakyas. Kinahanglan man Niyang tumanon ang Iyang Pulong. Nagatoo ako niana. Nagatoo ako niana maingon nga ako usab . . .kaysa nagatoo ako nga nagatindog ko dinhi, kaysa nagatoo ako nga ania ako sa sulod niining bilding; mahimo man gud nga usa ra kini ka lipat-sa-mata, mahimong usa ra kini ka damgo. Pero sa akong kalag, nasayod ako nga buhi si Jesus Cristo nga Anak sa Dios. Ug kamo ingon nga Binhi ni Abraham, kamo ingon nga mga patay na diha kang Cristo, Binhi kamo ni Abraham.

<sup>110</sup> Bueno aduna sila’y mga panyo dinhi. Dakung kalampusan gayud ang nabuhat pinaagi niining, mga tawo nga nanagpanoo. Karon iduko nato ang atong mga ulo samtang nagaandam sila, ug iampo nato ang mga niini.

<sup>111</sup> Langitnong Amahan, gikatudloan kami sa Biblia, ug aniy mga tawo dinhi nga nagatoo sa matag Pulong nga Imong gisulti nga mao ang Kamatuoran. Ginoos, usahay nagaduhaduha sila ug ginasuksok ngadto sa yawihanan, gamit ang yawi, pero dili makasulod, ug magari-garas lang, pero nagatoo sila nga anaa gyud kini dinha. Itugot nga magpadayon lang sila sa pagsuksok, og makaplagaan ra nila kini, kay anaa man gyud kini dinha. Ug kana nga yawi mao ang husto nga yawi, “Kung mahimo mong toohan, ang tanang butang mamahimo.” Samtang ginakanta karon ang maong awit, o ginatugtog.

112 Sa Biblia ginaingon dinha nga, “Mikuha si Pablo gikan sa iyang lawas og mga panyo ug mga panapton, ug gipadala ang mga niini ngadto sa mga may sakit ug mga nagaantus, ug mibiya sa mga tawo ang mahugaw’ng mga espiritu, ug nangaayo sila.”

113 Karon, Ginoo, nasayod kami nga kauban Ikaw ni San Pablo. Apan, dili man siya kadto; Ikaw kadto mismo, Ginoo, si Cristo nga anaa kaniya. “Dili na ako ang nagakinabuhi, kondili si Cristo na nga nagakinabuhi sa sulod nako,” ang ingon niya.

114 Ug karon sa niini nga henerasyon, Ikaw sa gihapon ang Cristo, karong panahona, maingon sa kung unsa Ikaw kaniadto. Ug samtang ginaampo ko kini nga mga panyo, ginahikap ang mga niini, nagaampo ako nga Imong buntogon ang matag kaaway. Hatagi sila og pagtoo, aron masayran nila nga ang matag kaaway nabuntog na.

115 Ug usa niadto ka higayon, ang Dagat nga Mapula, ang nakababag sa Israel gikan sa saad, maingon sa bag-ohay lang namong gihisgotan, ug atua sila kaniadto sa linya sa pangatungdanan. Ug miingon ang usa ka manunulat, nga, “Midungaw ang Dios nga suko ang mga mata, pinaagi niadtong Haligi nga Kalayo, ug nahadlok ang dagat ug giablihan ang mga ganghaan niini, ug mingtabok sila.”

116 Pagdungaw sab, karong gabhiona, pinaagi sa Dugo ni Jesus Cristo. Ug hinaut, sa diha nga maipahimutang na kining mga panyo ngadto sa mga may sakit, hinaut nga makita sa kaaway ang among pagtoo, karong gabhiona, samtang ginaampo namo kining pag-ampo nga inubana’g pagtoo alang kanila. Ug hinaut nga makalingkawas ang matag usa, sa Ngalan ni Jesus Cristo. Amen.

117 Karon buot ko nga ihatag ninyo kanako ang inyong bug-os nga pagtagad. Kon kinsa man ang nagakontrol niining mikropono dinhi, kon mahimo pakusgan mo kini. Tungod kay, kung buhaton kini sa Balaang Espiritu . . . wala ko ginaingon nga buhaton gyud Niya.

118 Karon kon adunay si kinsa man nga moanhi dinhi ug sultihan kamo nga aduna sila og gahum para ayohon ang may sakit, ayaw ninyo toohi kana. Ang tibuok gahum anaa ra man kang Cristo. Siya mao ang Mangdadaug, dili kamo ug ako. Igo na lang natong ginadawat ang kung unsa ma’y gibuhat na Niya. Wala gyu’y tawo nga may gahum aron mangluwas o moayo.

119 Ang matag tawo sa kalibutan, gibayaran na ang bili. Ang gikinahanglan gibayaran na. Sa unsa mang paagi? “Siya gisamaran tungod sa atong mga kalapasan, tungod sa Iyang mga labod kita nangaayo.” Ang inyong—inyong kaayohan gibayaran na. Ang inyong kaluwasan gibayaran na. Aduna ba kamo’y pagtoo para moduol, og dawaton kini? Kana lang. Kung usa kamo ka Binhi ni Abraham, nan aduna gyud kamo’y pagtoo.

Gisaad kini sa Dios. Aduna gyu'y butang sa sulod ninyo nga nagaingon nga anaa kini dinha, ug mao gayud.

<sup>120</sup> Karon unsa man ang gasa? Usa ba ka gasa ang magsangyaw ug moayo og mga tawo? Dili. Ang gasa mao ang maipadaplin mo ang imong kaugalingon, aron mahimo kang gamiton sa Dios.

<sup>121</sup> Bueno gisaad Niya kana, ang kaulahiing ilhanan, sumala ni Jesus Cristo, "Maingon sa nahitabo kaniadto sa mga adlaw sa Sodoma, sa wala pa kadto gisunog." Dili ingon nga adisir mahitabo ang ubang mga butang, giwala ni Lot ang Ebanghelyo, ug uban pa; dili ingon-ana. Kondili sa wala pa kadto gisunog, mikanaug ang Dios diha sa porma sa usa ka tawo, ug nagpabilin kauban ang pinili nga Iglesia, si Abraham ug ang iyang grupo, nga nakabaton sa saad.

<sup>122</sup> Karon timan-i n'yo, ang Binhi lamang ni Abraham ang magadawat niini. "Sa diriyut lamang panahon ug ang kalibutan dili na makakita Kanako," ang ingon ni Jesus. "Kamo makakita Kanako, kay Ako magauban kaninyo, sa sulod ninyo, hangtud sa katapusan sa kalibutan."

<sup>123</sup> Apan nagsaad Siya, nga sa dili pa Siya mobalik pag-usab, "Maingon sa nahitabo kaniadto sa Sodoma," tan-awa n'yo kung unsay nadawat sa Sodoma kaniadto; tan-awa n'yo kung unsa pu'y madawat sa pinili nga Iglesia, ang ingon, "mao man usab ang mahitabo sa pag-abot sa Anak sa tawo." Napadayag ang Dios diha sa porma sa usa ka tawo, nga sa nakatalikod Siya sa balongbalong, gisulti kung unsa ang gibuhat ni Sarah sulod sa balongbalong. Ang tanan nga nasayod nga Kamatuoran kana, ipataas n'yo ang inyong mga kamot. Eksakto gayud. Bueno gisaad Niya kini. Ania na kita sa katapusang panahon. Karon hinumdumi n'yo, nga mao kadto ang kaulahiing butang nga nahitabo; ug ang kalibutan sa Gentil gisunog, ang Sodoma, ug miabot sa esena ang gikasaad nga anak. Nanagpaabot man kita sa usa ka gikasaad nga Anak, ang Anak sa Dios.

<sup>124</sup> Ania na kita. Hinaut nga ablihan unta sa Dios ang inyong mga mata. Wala na'y unsa pa man nga nahibaloan ko nga isulti. Hinaut nga ablihan gyud Niya ang inyong mga mata.

<sup>125</sup> Karon Langitnong Amahan, wala gayud ako'y mahimo, ingon nga usa lang ako ka tibugol nga lapok nga Imong giyumol, ug gipahimutang dinhi. Oh Dios, hinaut nga ako, karong gabhiona, makaangkon unta sa Imong grasya ug Presensiya, aron nga mahimo Mong gamiton kining mga gagmay'ng tibugol nga lapok nga aduna Ka dinhi. Nga sila Ginoo, nga Imong gitawag ngadto sa Kinabuhing Walay Katapusan, ug tingali wala pa nadawat Kini, hinaut nga makita nila kini nga mga saad. Tingali'g gikatudloan sila nga para ra kini sa laing panahon, pero ania man kini sa Biblia. Panghimatud-i Kini, Ginoo. Mao kana ang Imo Mismong paghubad. Dili na kana magkinahanglan og labaw pa niana. Kung buhaton Mo kini nga ingon niana,

nan makita nila nga ang Pulong tinuod. Itugot kini, Amahan. Ginatugyan namo ang among mga kaugalingon nganha Kanimo.

<sup>126</sup> Itugot nga ang matag tawo dinhi, Ginoo, gamiton unta ang ilang pagtoo, karong gabhiona. Hinaut nga ang matag miyembro sa Banay ni Abraham, pinaagi ni Jesus Cristo, makabaton unta og pagtoo, karong gabhiona, ug dawaton ang Imong Presensiya. Ug pagadayegon Ikaw namo. Amen.

<sup>127</sup> Karon, kini ba ang ula- . . . Karon talagsaon gyud kini. Buot ko nga tabangan n'yo ako karon, iampo n'yo ako. Lingkod mo nga hilum ra gayud, ayaw mo paglakaw-lakaw. Magpabilin ra nga nakalingkod, og mag-ampo.

<sup>128</sup> Karon, kita n'yo, nagausb na kini gikan sa pagpang-ebanghelyo, ngadto sa pagkalma sa imong kaugalingon sa usa ka paagi aron bug-os ka nga madala sa Espiritu sa Dios ngadto sa lahi nga dimensyon.

<sup>129</sup> Bueno ania nagatindog kining batan-ong. . . Duol pa ngari diyutay, gining. Ug igo lang. . . Okey na kana, aron nga dili ra ko mapalayo niining mikropono. Kita n'yo, wala ko kahibalo kung unsay mahitabo, nakita n'yo, ug gani usahay, kabalo mo. . . Karon ang nahibaloan ko lang bahin niini, kini'y—sa mikropono man gud kini, nakita n'yo, ug ginasulayan man nilang irekord kini dinha, ug wala lang ko kabalo kung unsa.

<sup>130</sup> Karon dili kita magkaila sa usa'g usa. Wala ako makaila kanimo, og wala pa ta ka nakita sukad-sukad sa tibuok kong kinabuhi. Pero mas batan-on ka pa kay kanako. Ug tingali'g natawo kita nga minilya ang kalay-on, ug mga tuig ang kalay-on. Mao kini ang una natong panagkitaay. Husto ba? Kung mao man, ipataas ang imong kamot aron makita sa mga mananambong. Bueno, siya'y usa lamang ka babaye nga nagatindog dinhi.

<sup>131</sup> Ania, balikan ninyo kini sa Kasulatan. Ablihan nato ang San Juan 4. Ang matag usa kaninyo basaha n'yo kini inig uli ninyo. Dili—dili ingon nga kining maong babaye ingon niadto nga matang sa babaye; wala ko kahibalo. Ug kabalo man mo nga dili ako si Jesus Cristo. Apan ania Siya. Siya man kini. Karon ang Iyang Espiritu nga nagadihog kanamo, mahimo gayud nga ipadayag ang problema sa maong babaye, maingon sa Iyang gibuhay kaniadto sa babaye nga atua sa atabay. Mao ra mismo.

<sup>132</sup> Ug, tungod niadto, ang mga sacerdote ug mga lider niadtong panahona, nanag-ingon, “Kining Tawhana usa ka manghihimalad, o usa ka yawa, Beelzebug.”

<sup>133</sup> Pero ang sulti niadtong babaye, “Sir, naila ko nga Ikaw usa ka propeta. Nasayod kami nga moabot ang Mesias, ug kana ang mamahimo Niya nga ilhanan.”

<sup>134</sup> Karon, pila man ang nasayod nga tinuod kana? Bueno, kung Siya mao sa gihapon kagahapon, karon, ug hangtud sa kahangturan, dili ba ingon niana gihapon ang Iyang ilhanan.

karong gabhiona? Gisaad ba Niya nga mahitabo kini, sa dili pa ang katapusan sa panahon? Karon tan-awa n'yo kung ginatuman ba Niya ang Iyang saad ngadto sa Binhi ni Abraham.

<sup>135</sup> Karon kung aduna ma'y tawo dinhi nga gahunahuna nga sayup kana, nan duol mo ngari ug buhata n'yo ang mao mismong butang. Kung dili man, nan ayaw mo pagsulti og unsa man mahitungod niini. Aduna kamo'y pribilihiyo.

<sup>136</sup> Karon, sa Ngalan ni Cristo, ginapahimutang ko ang matag espiritu ilalum sa akong pagkontrola, alang sa kahimayaan ug kadunggan sa Dios.

<sup>137</sup> Makig-istorya lang sa ko kanimo, sa makadiyut, batan-ong babaye. Abi nimo, ang atong Ginoo nagpakig-istorya man kaniadto sa maong babaye nga atua sa atabay. Miingon Siya, "Hatagi Ako og mainom." Unsa ma'y ginabuhat Niya?

<sup>138</sup> Karon matikdi n'yo, Siya miingon, sa San Juan 5, "Sa pagkatinuod, sa pagkatinuod, magaingon Ako kaninyo, ang Anak," mao kadto Siya, ang lawas, "dili makabuhat og bisan unsa sa Akong Kaugalingon," gawas lamang sa Iyang nakita nga ginabuhat sa Amahan. "Ang ginabuhat sa Amahan, ginapakita Niya sa Anak. Kita n'yo, dili Ako makabuhat og bisan unsa sa Akong Kaugalingon, gawas lamang sa Akong makita nga ginabuhat sa Amahan." Kung ingon-ana, wala gayud si Jesus nagbuhat og usa ka milagro gawas kon gipakita una Kaniya sa Dios pinaagi sa usa ka panan-awon; dili nga ginasulti Kaniya diha sa Iyang dalunggan, kondili ginapakita mismo Kaniya. "Kung unsa ang Akong makita," dili nga madungog, "makita nga ginabuhat sa Amahan." Kana ang nagpahimo Kaniya nga usa ka Propeta nga sama ni Moises, maingon sa gisulti ni Moises kaniadto. Bueno sa diha nga Iyang—Iyang mahibaloan nga ang Amahan...atua Siya...

<sup>139</sup> Paingon unta Siya kaniadto sa Jerico, apan kinahanglan man Niya nga moagi sa Samaria, ug miadto Siya sa lungsod sa Sicar. Ug ania tan-awa n'yo, ang mga Samarianhon nanagpaabot gyud sa usa ka Mesias.

<sup>140</sup> Ang mga Judio nanagpaabot man pud niadto, ug gipakita Niya kanila ang Iyang ilhanan. Si Felipe, si Natanael, si Pedro, sa dihadiha nga gipakita kadto nga ilhanan, miingon sila, "Ikaw mao ang Anak sa Dios."

Ang ingon pud sa rabbi, "Kining Tawhana Beelzebub."

<sup>141</sup> Apan karon hinumdumi n'yo, ang mga Gentil, kita, kita nga mga Anglo-Saxon, kita—wala pa kita kaniadto nagpaabot sa unsa man nga Mesias. Mga pagano kita kaniadto, ang mga Romano, ug uban pa. Wala pa kita nagpaabot sa unsa man nga Mesias. Nagaabot lamang Siya alang niadtong mga nagapaabot Kaniya.



142 Ug nagapaabot na Kaniya ang mga Samarianhon, mao nga kinahanglan Niya nga adtoan sila, didto sa Samaria. Milingkod Siya didto sa may atabay. May usa ka batan-ong babaye, tingali'g mga kaedad nimo, ang migawas didto. Usa siya ka babaye nga mahugaw'g-dungog. Nabasa na nimo ang maong estorya, siguro. Ug Siya miingon, "Babaye, hatagi Ako og mainom."

143 Miingon ang babaye, "Oh, dili baya nabatasan para Kanimo, nga usa ka Judio, nga mangayo sa usa ka Samarianhon og ingon niana."

144 Miingon Siya, "Apan kung nasayod ka lang kung Kinsa ang imong gikaistorya, mangayo ka gayud Kanako og mainom."

145 Nagpadayon ang maong pag-istoryahanay. Sa katapusan, hingsayran Niya kung unsay iyang problema. Nahinumduman mo ba kung unsa kadto? Daghan kaayo siya og mga bana. Ug miingon, "Lakaw'g kuhaa ang imong bana, og balik dinhi."

Miingon ang babaye, "Wala man ko'y bana."

146 Miingon, "Tinuod ang imong giingon," ingon pa, "kay nagkaaduna ka na og lima, ug ang usa nga gikaipon mo karon dili man imong bana."

147 Miingon ang babaye, "Sir, naila ko nga Ikaw usa ka propeta. Nasayod kami nga pagmoabot na ang maong Mesias, isulti Niya kanamo ang ingon niining mga butang."

Ug Siya miingon, "Ako mao Siya."

148 Gibiyaan sa babaye ang iyang banga, midalagan ngadto sa siyudad, ug miingon, "Umari kamo, tan-awa ninyo ang usa ka Tawo Nga nagsulti kanako sa mga nabuhat ko. Dili ba mao na kini ang Mesias?" Gatusan na ka mga tuig nga wala sila'y propeta. Ug ania ang usa ka Tawo nga nagpahayag nga mao ang Mesias, ug napamatud-an nga usa—usa gyud ka propeta, ug gipakita ang ilhanan sa usa ka Mesias.

149 Makapahimo ba kini kanimo nga motoo sa mao gihapong butang, kung buhaton Niya ang mao mismong butang, ingon nga Siya mao sa gihapon kagahapon, karon, ug hangtud sa kahangturan, ug nagsaad pinaagi niining mga Kasulatan nga buhaton Niya kini?

Makapahimo ba kini sa mga mananambong nga motoo?

150 Nagaantus ka tungod sa sakit sa kidney. Kung tinuod kana, ipataas ang imong kamot.

151 Ngano kaha nga mora'g sigeng gabalik kini sa ako? Aduna man gu'y nagaingon, "Gitagna-tagna lang niya kana." Wala ko gayud kini gitagna-tagna.

152 Ania, usa siya ka maayo nga babaye. Nagatoo ka ba kanako? Karon nasayod ka nga wala nako gitagna-tagna kana. Tugoti kong isulti ang laing butang. Kauban nimo ang imong bana.

Nagaantus siya, usab. Dili ba? Tungod sa usa ka kahimtang sa dugokan. Tinuod. Dili ba? Aduna ka'y kauban nga batang lalaki. Nagaantus siya, usab. Mao nga gusto nimo nga maiampo siya. Adunay problema diha sa iyang mga mata. Husto kana. Aduna pud ka'y kauban nga batang babaye, aduna siya'y sakit sa kidney, sama nimo. Husto ba kana? Karon mamaayo na kamong tanan, kung motoo kamo. Nagatoo ba kamo niini? Panalanginan kamo sa Dios. Lakaw na ug mamaayo na.

<sup>153</sup> Nagatoo ba kamo? Siya mao sa gihapon kagahapon, karon, ug hangtud sa kahangturan. Unsa man kini? Unsa ma'y ginapaningkamotan Niyang buhaton? Sa inyo, nga Binhi ni Abraham, ginapakita Niya kaninyo nga dili Siya patay. Dili ko arang mahimo kanang mga butanga. Dili Siya patay. Kondili Siya'y buhi gayud, og ginapakita sa inyo nga aduna kamo'y katungod aron panag-iyahon ang mga ganghaan sa inyong kaaway. Mao gayud kana.

<sup>154</sup> Kining babaye, duol dinhi dapit, sa makadiyut. Kita'y halos, magka-edad ra, sa hunahuna ko. Apan kita'y—kita'y mga estranyo sa usa'g usa, sa nasayran ko. Wala ako makaila kanimo, ug dili kita magkaila. Walay unsa man nga nasayran ko mahitungod kanimo. Kung tinuod man, ipataas ang imong kamot, kita mo. [Nagaingon ang igsoong babaye, “Husto kana.”—Ed.] Aduna la'y naghatag kanimo og prayer kard, ug ania ka. Sige. Karon kung ang Ginoong Jesus. . .

<sup>155</sup> Kung ako, tingali, ingnon tà nga nagasulay ko nga mopuli kang Igsoong Oral Roberts o usa niadtong halangdong tawo sa pagtoo, moingon ako, “Gining, unsa ma'y imong sakit?”

<sup>156</sup> Moingon ka, “Bueno, aduna ko'y *ingon niini-ug-ingon niana*.” Karon, tingali'g dili siya husto. Kita n'yo? Wala ko kabalo. Kita n'yo? Apan, siya, mahimo mong sultihan siya kung unsay imong sakit.

<sup>157</sup> Magpandong siya og mga kamot nganha kanimo, moingon, “Gipadala ako sa Dios para—para iampo ang mga may sakit. Nagatoo ka ba niana?” “Oo.” “Himaya sa Dios! Lakaw na, og toohi kini.”

<sup>158</sup> Okey lang kana. Okey lang man kana. Gisaad kana sa Dios. Apan, kita n'yo, nagakinabuhi man kita sa—sa adlaw nga mas malampuson kaysa kaniadto. Nagsaad si Jesus, “Maingon sa nahitabo kaniadto sa mga adlaw sa Sodoma. Ang mga buhat nga Akong ginabuhat pagabuhaton usab ninyo.”

<sup>159</sup> Karon, kung mahimong isulti kanako sa Dios kung unsa ang imong giagian, nasayod ka kung kana ba'y tinuod o dili, masulti pud Niya sa imo kung unsay mahitabo kanimo, ug kung tinuod kana, nan kini'y mamahimong tinuod, usab.

<sup>160</sup> Kung isulti Niya kanimo, ang bisan unsa man, wala ko kabalo, pero kung isulti Niya kanako kung unsa ang imong sakit, motoo ba kamo, usab, mga mananambong?

<sup>161</sup> Kinahanglan ko nang mohunong. Niadtong usa ka higayon, kadtong tawo nga ania kaganina, nagpanghimatuod na kadto. Gibuhat kadto ni Jesus sa usa ra ka higayon. Wala na Niya kadto buhata sa usa pa ka higayon. Tungod nga ang tanan didto sa Sicar mitoo man niadto, mitoo sa pagpamatuod niadtong babaye, sa diha nga miadto siya, og gisultihan sila, ug siya'y usa pa gani ka babaye nga mahugaw'g-dungog. Usa ka Cristohanon ang minaug sa entablado bag-ohay pa lang, sa atubangan ninyong tanan! Amen. Pero ingon nga mahimong ulahi na kini kaysa atong ginahunahuna, hinaut nga ipadayon sa Ginoo nga pamatud-an ang Iyang Kaugalingon, ang halangdong Gamhanang Mangdadaug, nga ang Binhi ni Abraham. . . Apan sama kang Abraham, gibuhat Niya kadto para kang Abraham, sa usa ka higayon; dayon giguba kadto, ug gibuhat pag-usab. Padayon ra gayud nga mitoo si Abraham sa Dios.

<sup>162</sup> Wala ka mianhi para sa imong kaugalingon. Ania ka para sa ubang tawo, ug usa kini ka babaye. Imong igsoong babaye. Ug ang babaye nalandongan og kamatayon. Ug nagaantus siya tungod sa—sa diabetes. Ug dili siya taga dinhi. Siya'y taga . . . Siya'y taga-Louisiana, nga usa ka kalapokan nga lugar. Kana . . . Ug aniay usa pa ka butang, aron masayran kini sa mga mananambong. Aduna ka'y anak nga babaye nga nagmasakiton gayud, nga nagplano pa gani nga motambong unta niini nga panagtigum, ug aduna siya'y epilepsy. Tinuod kana. Tinuod kana. Di ba? Nagatoo ka na ba karon? [Nagaingon ang igsoong babaye, "Oo. Amen."—Ed.] Kung Binhi ka ni Abraham, nan dawata kini ug molakaw na, ug mamaayo na sa Ngalan ni Jesus Cristo.

<sup>163</sup> Nagatoo ba kamo? Sigurado gayud. Hinumdumi ninyo, Iya kining saad. Miingon Siya nga buhaton Niya kini. Ginatuman gyud Niya ang Iyang saad.

<sup>164</sup> Kumusta ka? Dili kita magkaila sa usa'g usa. Wala ako makaila kanimo. Apan nakaila kanimo ang Dios. Nagatoo ka nga kung mahimong ipadayag kanako sa Dios ang imong sakit, kung ingon-ana nasayod ka nga siguradong nagagikan kini sa usa ka espirituhanong gahum. Karon, duha lamang ka butang ang mahimong gigikanan niini, nga mahunahuna ninyo. Pag ipahinabo na kini, kini'y lagpas gayud sa mahimong isaysay, tungod kay usa man kini ka katingalahan. Ug, usab, usa kini ka paradox; usa ka butang, bueno, nga mora'g dili masabtan, pero tinuod. Mahimong usa kini ka paradox. Ug karon nasayod ka niini, kung kini ba'y tinuod o dili, mahibaloan mo man kung kamatuoran ang Iyang gisulti kanimo.

<sup>165</sup> Karon, timan-i, wala ako makaila kanimo. Mao nga sigurado gayud nga usa kini ka Persona gawas pa sa ako. Kung sama ka sa mga Fariseo, nga miingon, "Oh, usa kana ka dautang espiritu," kung ingon-ana maangkon mo ang ganti niana. Kung nagatoo ka nga si Cristo kini, nan maangkon mo ang Iyang

ganti. Ang hinungdan nga makatoo ka niini, tungod kay gisaad man Niya kini alang niini nga panahon, ug wala gani ingon niana nga nahitabo sukad niadtong panahona gawas lang niini nga panahon. Kana ang nagpahimo niini ingon nga katapusang panahon.

<sup>166</sup> Adunay tawo nga sigeng gapakita sa atubangan mo, pirmi. Usa ka lalaki, nga ubanon na. Imo kining bana. Nga nagalingkod dinha. Ginapaninguhaan niyang madawat ang iyang kaayohan, ingon nga nalandongan siya og kanser, dunay tumor, nga kanser. Aduna pud ka'y sakit sa kidney, sakit sa pantog. Kamo si Mr. ug Mrs. Little. Husto ba kana? [Nagaingon ang igsoong babaye, "Oo."—Ed.] Tumoo kamo sa tibuok ninyong kasingkasing, ug mamaayo na.

<sup>167</sup> "Nasulti mo ang iyang, ilang ngalan?" Aba, sigurado gayud. Dili ba gisultihan ni Jesus si Pedro, "Ang imong ngalan mao si Simon, anak ka ni Jonas"?

<sup>168</sup> Aniyay usa ka lalaki. Dili kita magkaila sa usa'g usa, sir. Wala ako makaila kanimo. Pero usa ka ka lalaki, nga sama—sama ni Pedro nga miduol kaniadto kang Ginoong Jesus, ingon nga magkauban kita. Nagatoo ka ba kanako nga Iyang alagad? Nagatoo ka ba nga kamatuoran ang akong ginasulti? [Nagaingon ang igsoong lalaki, "Oo, sir. Nagatoo ako, sir."—Ed.] Kung mahimo mong toohan! Ako, kung aduna la'y butang nga mahimo ko para kanimo, buhaton ko gayud, pero wala man ko'y mahimo. Gibuhat na Niya kini; usa lang kini ka butang nga mag-aghat kanimo para toohan kini. Ug, kita n'yo, dili kini ako. Kay kung ako man kini, nan akong—gibuhat ko na ang tanan-tanan nga mahimo ko para kanimo. Apan gihatagan Niya ako og usa ka gasa, ug ginapapahulay ko lang ang akong kaugalingon sa atubangan Niya, ug Siya na ang nagasulti. Nagatoo ka ba niana? ["Oo."]

<sup>169</sup> Nagatoo ba kamo niana, mga tigpaminaw?

<sup>170</sup> Buot ko nga makakaplag og lalaki. Pagkadaghang butang nga problema kanimo. Apan ang usa sa mga niana, aduna ka'y bukol sa imong tuo nga mata. Mao kana ang imong pinaka-sakit. Aniyay usa pa, may usa ka babaye nga sigeng gapakita dinhi. Imo kining asawa. Nagatoo ka ba nga mahimong isulti kanako sa Dios kung unsay problema sa imong asawa dinhi? Ang iyang sakit anaa sa iyang baba. Ang iya kining ngipon. Husto. Nagatoo ka ba nga ang mao ra nga Jesus, Nga nakaila kung kinsa si Simon Pedro, mahimo pud nga isulti kanako kung kinsa ka? [Nagaingon ang igsoong lalaki, "Oo."—Ed.] Makapahimo ba kini kanimo nga motoo sa bug-os gayud? ["Oo, sir."] Makapahimo ba gyud? ["Oo."] Oscar Barnes. ["Husto kana."] Husto ba kana? Pauli na, og mamaayo ka na.

<sup>171</sup> [Blangko nga bahin sa teyp—Ed.] . . . estranyo kanimo. Wala ako makaila kanimo, apan nakaila kanimo ang Dios. Nagatoo ka

ba nga arang Niyang isulti kanako kung unsa ang imong sakit? Motoo ka ba niini sa tibuok mong kasingkasing? Ang imong sakit anaa sa palibot sa imong tutunlan, ug sa imong dughan dinhi. Kini’y usa—kini’y usa ka pagkagabok sa bukog. Aduna ka’y mga bukog-bukog, mora’g ingon-ana, ug mga lusay-lusay sulod sa istraktura sa bukog. Husto kana. Dili ka taga dinhi. Anaa ka sa usa—usa ka siyudad nga may mga umahan sa kahil sa tibuok palibot niini. Napahimutang kini sa walog, nga may kabukiran nga talan-awon sa luyo niini. Aduna pud didto og hotel nga Antlers ang ngalan. San Bernardino kini. Taga didto ka. Uli na, giayo ka na ni Jesus Cristo, kung motoo ka niini.

<sup>172</sup> Adunay usa lamang nga makapaayo og kanser, kana ang Dios. Nagatoo ka ba nga ayohon ka Niya? [Nagaingon ang igsoong lalaki, “Nagatoo gyud ko.”—Ed.] Toohi kini! Lakaw na, ug hinaut nga bug-os ka nang ayohon sa Ginoong Dios.

<sup>173</sup> Bag-ohay lang nga ikaw gayu’y-. . . ginerbiyos og ayo, nalisang gayud. Tungod niini nga pagkanerbiyos, ang imong tiyan nagkaaduna og dili-maayo nga kahimtang. Dili ka mahilisan sa imong pagkaon; mao nga nagasuka ka. Nagasaka ang tanang acid diha sa imong baba. Pag dapit na sa kahaponon, kapoyon ka na og ayo ug tanan na. Aduna ka’y peptic ulcer sa imong tiyan. Nagatoo ka ba nga si Jesus Cristo ang nagasulti niana kanimo? [Nagaingon ang igsoong babaye, “Oo.”—Ed.] Lakaw og kaon na sa imong panihapon, kung ingon-ana. Tumoo ka sa tibuok mong kasingkasing, giayo ka na ni Jesus Cristo.

<sup>174</sup> Kumusta ka? Daghan kaayo ka og mga sakit. Pero ang usa sa mga butang nga imong gikahadlokan, mao ang mabakul ka tungod sa arthritis. Apan nagatoo ka ba nga ayohon ka sa Dios, himoon ka nga mamaayo na gikan niini? [Nagaingon ang igsoong babaye, “Oo.”—Ed.]

<sup>175</sup> Ginoong Jesus, ginaampo ko nga itugot Mo kini para sa akong igsoong babaye. Ihatag kaniya ang iyang panan-aw. Tangtanga gikan kaniya ang sakit pang-babaye, ug ayoha na ang arthritis, sa Ngalan ni Jesus. Amen.

<sup>176</sup> Lakaw na karon, nga nagatoo. Buhaton gyud Niya kini, ug mamahimong okey na kini. Ayaw pagduhaduha, padayon ka lang sa paglakaw, ug tumoo ka sa tibuok mong kasingkasing.

<sup>177</sup> Makahahadlok gyud nga butang ang sakit sa kasingkasing, apan si Cristo man ang nagaayo sa kasingkasing. Nagatoo ka ba niana? [Nagaingon ang igsoong babaye, “Oo.”—Ed.] Lakaw na, toohi kini, ug matapos na kining tanan. Tapos na kini.

<sup>178</sup> Nagatoo ka ba nga mabakul ka? Dili, mora’g dili man sa tan-aw ko, usab. Sa hunahuna ko, arthritis; kanang landong dinha, oh, kanser diay kana. Nagatoo ka ba nga ayohon Niya kini? [Nagaingon ang igsoong babaye, “Oo, nagatoo ako.”—Ed.] Lakaw na, og toohi kini. Ayohon ka na Niya.

179 Ginahasol ka niana sa dugay na nga panahon, tungod nianang pagbara sa kasingkasing. Apan nagatoo ka ba nga matapos na kana, karong gabhiona? Lakaw, og toohi kini, giayo ka na ni Jesus Cristo.

180 Nagaantus ka, tungod sa sakit pang-babaye, sa dugay na nga panahon. Ug ikaw, usab, maglisud ka og bangon inig mabuntag. Tungod manggahi man, ang imong mga bitiis. Dili ka halos makalakaw, nga hapit tunga sa adlaw, ang gidugayon. Arthritis kini. Lakaw na, og ayaw pagduhaduha, dili ka na magkaaduna niini. Toohi lamang, sa tibuok mong kasingkasing.

181 Dagma'y problema sa imo, nga komplikasyon. Apan ang usa ka butang nga nagahasol kanimo og ayo, ginahunahuna mo usab ang arthritis, nga mao kini'y, nagapabakul kanimo. Nagatoo ka ba nga himoon Niya nga makalakaw ka og mamaayo na? [Nagaingon ang igsoong babaye, "Oo, sir."—Ed.] Lakaw na, og toohi kini sa tibuok mong kasingkasing, giayo ka na ni Jesus Cristo.

182 Ginanerbiyos nga kasingkasing, ug arthritis, apan nagatoo ka ba nga ayohon ka sa Dios? Nagatoo gyud ka? Lakaw na, ug hinaut nga ayohon ka na gyud ni Ginoong Jesus.

183 Ginahasol gyud ka og ayo niana nga tiyan sa mga nangaging pipila ka tuig, dili ba? Pero dili na karon. Lakaw na, toohi kini. Panalanginan ka sa Dios. Mamaayo ka na.

184 Ikaw, usab, giayo na ang imong tiyan. Lakaw na, tumoo ka sa tibuok mong kasingkasing. Ayaw pagduhaduha.

185 Maglisud ka og ginhawa, tungod nianang hubak nga nagapaluya gayud kanimo, dili ba? Nagatoo ka ba nga matapos na kini karon? [Nagaingon ang igsoong lalaki, "Oo."—Ed.] Sige, lakaw na og toohi kini. Amen.

186 Alleluyah! Nagatoo ba kamo sa tibuok ninyong kasingkasing?

187 Kadali lang. Wala ba ninyo nakita kanang Kahayag dinha? May usa ka gamay'ng itum nga babaye ang nagatan-aw kanako, nga nagalingkod dinha, aduna siya'y tumor diha sa iyang wala nga kilid. Aduna siya'y sakit sa kidney, og mga komplikasyon. Mas aduna man ka'y pagtoo. Dili mo na kinahanglan nga moduol pa dinhi. Tapos na kini. Toohi lamang. Amen. Magmaaduna ka og pagtoo sa Dios!

Nagatoo ka ba niana?

188 Nagatoo ka ba, igsoong babaye, nga nagalingkod dinha, nga mamaayo ka nianang sakit sa dugokan? Nagatoo ka ba nga ayohon ka Niya? Sige. Ayaw lang pagduhaduha niini, ug maangkon mo gayud kini kung motoo ka lamang.

189 Ang lalaki nga nagalingkod dinhi, nga nagatan-aw sa ako, nagaantus siya tungod sa sakit sa prostate, magsige lang og

bangon inig magabii ug mga ingon niana. Nagatoo ka ba, sir? Matapos na kini, kung ingon-ana, kung nagatoo gyud ka niini.

<sup>190</sup> Aniyay usa ka itum nga lalaki nga nagalingkod dinhi dapit, og nagatan-aw kanako. Nagaantus siya tungod sa epilepsy. Nagatinguha usab siya sa bautismo sa Espiritu Santo. Tumindog ka, sir, dawata ang imong kaayohan. Hinaut nga ihatag kanimo sa Dios ang bautismo sa Espiritu Santo. Amen.

<sup>191</sup> Nagalingkod diha sa atbang mo mismo, may usa ka bata nga nagalingkod dinha, nga aduna usab og epilepsy, ginaatake siya unya makuyapan, nga nagalingkod dinha, sa pikas kilid. Nagatoo ka ba nga ayohon sa Dios ang maong bata, dinha? Nagatoo ka ba sa tibuok mong kasingkasing? Kung ingon-ana ayohon gyud sa Dios ang maong bata.

<sup>192</sup> Nagatoo ba kamo, ang matag usa kaninyo? Dili—dili ba Siya—dili ba Siya’y tinuod gayud nga Binhi ni Abraham? Dili ba Siya mao ang Gamhanang Mangdadaug? Gisaad ba Niya nga mapanag-iyang ninyo ang mga ganghaan sa kaaway?


<sup>193</sup> Pila man kaninyo ang nagapos, nga nabati ang pagpaantus sa kaaway? Ipataas ang inyong mga kamot, nga mga nakabati sa pagpaantus sa kaaway, ug kamo’y Binhi ni Abraham, ipataas n’yo ang inyong mga kamot nga nakaingon *niini*. Moingon, “Igsoong Branham, ginahasol ako tungod sa pagkanerbiyoso.” Oh, halos otsenta porsyento kaninyo ang anaa niana. Ingnon ta, ako . . . Nagkabaga na gyud karon, ang tan-aw ko sa tanang mga tawo mora’g nagakahanap na, nga mora’g mabuta na ako, dinha mismo kon asa kamo.

<sup>194</sup> Wala ba ninyo makita, nga dinhi adunay baynte o traynta, siguro, nga mga kaso, o sobra pa, dinhi mismo niining entablado ug dinha sa mga mananambong, nga ang Dios dili gayud mapakyas? Kini’y si Jesus Cristo nga mao sa gihapon kagahapon, karon, ug hangtud sa kahangturan. Nagatoo ba kamo niana? [Nagaingon ang kongregasyon, “Amen.”—Ed.] Kung ingon-ana nganong dili, ang matag Binhi ni Abraham, nganong dili man ninyo gamiton ang yawi karon? Ang gamhanang Mangdadaug, nga mibuntog niini para kaninyo, ania mismo karon. Gipamatud-an Niya nga ania gyud Siya. Nagatoo ba kamo Kaniya?

<sup>195</sup> Kung ingon-ana gamita ninyo ang inyong yawi sa pagtoo, kab-ota sa inyong mga kamot, ug moingon, “Jesus Cristo, nagatoo ako para sa akong kaayohan, karon mismo.” Tumindog kamo. Ipataas ang inyong mga kamot, ablihi ang inyong pagtoo karon. “Nagatoo ako, Ginoong Jesus. Nagatoo ako karon mismo.”

<sup>196</sup> Karon ipandong ninyo ang inyong mga kamot diha sa usa’g usa. Ituy-od n’yo ang inyong mga kamot diha sa usa’g usa, nga usa usab ka Binhi ni Abraham. Karon mag-ampo kamo alang niana nga tawo. Ipondong n’yo ang inyong mga kamot diha

kanila. Miingon si Jesus, “Kini nga mga ilhanan maganunot kanila nga nagatoo. Kung pandongan nila sa ilang mga kamot ang mga masakiton, mangaayo sila.”

<sup>197</sup> Satanas, napildi ka na sa gubat. Sa Ngalan ni Jesus Cristo, gumula ka dinha, ug buhii kining mga tawo, alang sa kahimayaan sa Dios. 



64-0207 Ang Patriarca Nga Si Abraham  
Kern County Fairgrounds  
Bakersfield, California U.S.A.

CEBUANO

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)